

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu — quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ² Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tanti. ³ Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid

yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵ Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemiaidquio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash. ⁶ Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquio icquin. ⁷ Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

⁸ Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquio nebi. Nidaid uabi yec ictenedi nebi. Nëbi adquid yec nibëdantiapimbo icquidquio nebi. Adquid yec abitedishun Icbombo nebi —queposh Nuquin Papa. Aidquio tantianuna.

Dacuëdampamboecnuc Esusën ismiaid

9 Esusbëd ictened Uan nebi. Mibëdtan Esus tantiaquid yec min utsibimboecquid nebi. Mibi yacpadembidi Esus tantiasho Èsus tantiesabon chieshëmpondashi. Adoac Esusën namiacpadec chieshtoenuio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacbimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. 10 Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacbimboec comapenec onquesho tantiapombi. Ushenquio icquimbi ushquin isacbimboen tantiombi. 11 Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidedishun iste dada uashun buame —quequin comapenec onquequin chuiposhi.

12 Comapenec onquesho tantiatanec bidadquin isquien tabote manitsinaid 7tedi icposh. Shocosh piu nacnenaquid neposh.

13 Aid nënantanquio Esusquio icposh. Con

matses isadaidbo chuiquid dapabimboec
 dasiuidaccosh. Dashcute ënapen icquid abitiombi
 datonquiacosh. Abi shictonquete bëshpiu-
 bëshpiuctsëcquid nuacquid dapambo icposh. ¹⁴ —
 Icsaisambo nec —camenuec aton mapi aton
 manëdaidbëdi abu ushubimboec ushumboshë
 icposh. —Matsesën naidtedi tantiaquidquio
 nec —camenuec cuëte isquidbimboec aton
 ëshë isquid-isquidquio icposh. ¹⁵ —Utsin:
 “Ëmbiquen abitedi namenu,” catiapimbo
 icnuc abitedimbo namequid nec —camenuec
 shocosh piu nacnenaidbimboec nac-nacquio
 aton taë icposh. —Nuquin Papapadquidquio
 nec —camenuec acte chododoquiacbimboec
 comapenec onqueposh. ¹⁶ Abiucshun uispa
 7tedi sanamposh. Chështe cuënumbo icquid
 ana shëcuënuësh cueshqueposh. —Matses icsaid
 cuidquidquio nec —camenuec adposh. Aton
 bëtantete ushëbimboec bëchamauanquiecposh. —
 Bëdambo icquidquio nec —camenuec ad icposh.

¹⁷ Dacuëdampamboecsho istanequini Esusën
 dayumbi uebudpaccoc unësaniacbimboec
 padishec. Adshobini Esusën camishquin
 bëdameposh. —Dacuëdenda. Nuquin
 Papapadquidquio nebi. Nidaid uabi yec ictenedi
 nëbi adquid yec nibëdantiapimbo icquidquio nebi.
 Adquid yec abitedishun Icbombo nebi. ¹⁸ Adquid
 yequi matsesën unës uaid yec uincuenash
 padpidec unëstiapimbo icquid nebi. Adquid icquin
 ëbi tantiaquido unësacsho uincuemeshun Con Pa
 yacno ëbëdi tabadmendambi. Ëbi tantiesaboembi
 icsaido cuidacno nidmendac —queposh Esus.

19 Adashic abi onquec: –Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. 20 Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi –quequin aden ismeposhi Esusën.

2

Epeso yacnocquido Esusën chiaid

1 Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. – Ëbi tantiaquido chuibanquidën Icho yec ëbi tantiaquidobëd iquebi –quequin aden ismeposhi. Adshumbic naden chuiposhi. – Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. 2 Mimbi naidtedi tantiaquid nebi. Dayacquo icquin ëmbi chiacpadomboen mimbi dadpen nabanoc. Utsibo chieshtonobi chieshtoenquio icquin mimbi ëbi tantioc. Ëbi tantiaquido icsamenuen chiec:

‘Esusèn namiaidquoio yec mibi chuinuec chopobi,’
 quequin muaquidon chuisho: ‘Mua. Nuquin
 Papan chiaidpenquoio mimbi chuibanoque.
 Utsibo chienda,’ quequin mimbi aidon chiaid
 tantienquoio iccoc. Aden mimbi bēdamboen naoc.
³ Adembidi utsibon chieshēnaqui chieshtoenquoio
 icquin Nuquin Papan chiaidbēdta ěmbi naid
 mimbi chuibanoc.

⁴ Aden bēdamboen nasho isun mibi icsaid
 abentsēc chuitsēcnu. Tauamboen mimbi ěbi
 tantiaquiopadene. Aden ěbi tantiaquidquoio
 icquin mimbi utsibotsen tantiaquiopadene.
 Adodeneděmbi pacuēnēdabimboen ěbi bēdiactsēc
 tantiatsēcquin utsibotsen mimbi bēdiactsēcbidi
 tantiatsec. Adec mibi icsacuededec. ⁵ Ěmbi
 chuiboed tantiash: ‘Ai, abimbo caic. Tauamboen
 Esus tantiaquiondaidi nēbimbi bēdiactsēc
 tantiachitec. Adchitequini icsaoc,’ queshun
 tauamboen mimbi naondacpadomboen ěbi
 tantiaquiota. Adembidi utsibotsen tantiaquiota.
 Adoenquoio icschoembi mibi yacnoshon ěmbi
 chiaid mibi chuibanquid nibēdmendac. Adnuc
 ěbi tantiec cuēdēnuec mibi pudued-puduedenquoio
 ictsiandac. ⁶ Mibi icsaid ěnquin chiombi. Nēbi
 mimbi naid utsitsen isash bēdambo iccobi. Mibi
 cuēdēnacno puduedshun nicodaitabon mibi
 icsamenuen icsamboen chuisho tantiashun:
 ‘Aido icsamboshē iquec,’ mimbi caoc. Adembidi
 aido bēdamboen istiapimbo icoaibi. ⁷ Nēbi
 ěbi tantiaquido utsibo chuinu. Ěmbi Epeso
 yacnocquido chuibocpadomboen con Mayanēn
 mibitsen tantiametsiashe. Pabiate cuembo icquin
 ěmbi chiaid tantiata. Satanasēn: ‘Icsamenu,’
 caqui chieshtoenquoio icquin ěbi tantiasho

Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied nënantan icquid cuëte matses unëstiapimbo icquid icmete icmepampic. Aid cuëte bacuë meniabcimboecnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata –quequin Esusèn chuiposhi.

Esmidina yacnoquido Esusèn chiaid

⁸ Adshumbic Esusèn padpiden chuioaposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmënquidon unës uacsho chococaqui uincuempaccondash. Adondaaid yec unësaid uincuemequidquo nec. Aidën naden chuiposhi. –Esmidina yacnoquidon ëbi tantiaquidon iste ëmbi naden chuiboed dada uata. “Tantia, Esmidina yacnoquido. Mibitedi chuinu. ⁹ Ëbi tantiaquido icsho utsibon chieshënac mimbi dayun uaid nibëdquiendac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëdamboshë iquendac. Chieshëmënquidon mibi icsamboen chuishumboedtsen tantiembi. Mibi yacnoshon Satanasën namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquo yec Satanasën yuaboen nec. ¹⁰ Aido tantiash: ‘Ashibi mëyampatsiash,’ quec dacuëndenda. Satanasën: ‘¿Ada Esus tantiaquido chieshtoenquo ictsiashe? Tanu,’ quequin namiacpadomboen chieshëmënquidon mibi utsi-utsien quënën

nauedbanendac. Adoac daëdpactsëc ushec mibi mëyadendac. Pудuenabi yec chieshtoenda. Chieshëmënquidon: ‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi. ¹¹ Nëbi ëbi tantiaquido utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquo icquin ëbi tantiasho isun icsaido cuidquiagno nësecainquo iquendambi,” quequin ëmbi chuiboed dada uata –quequin chuiposhi Esusën.

Pedcamo yacnocquido Esusën chiaid

¹² Adoshombic ana shëcuënuësh chështe cuënumboshë icquid cueshqueboedën Esusën naden chuoaposhi. –Pedcamo yacnocquidon ëbi tantiaquidon iste ëmbi naden chuiboed dada uata. “Tantia, Pedcamo yacnocquido. Mibitedi chuinu. ¹³ Mibi yacno Satanasën yuabo dadpen icnuc ëbi tantiec mibi chieshtoenquo iquec. Ënden Satanasën namiac mibi yacnoshon chieshëmënquidon con yua Antipas caid cuesunepondash. Aidën chieshtoenquo icquin ëmbi naid chuibansho cuesuniacsho isumbic adembidi chieshtoenquo icquin mimbi ëbi tantiaquiopondac. Aden mimbi bëdamboen naid tantiembi.

¹⁴ Adondaid tantiaquin mibi icsaidtsen chuinu. Mibi cuëdëncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë

matses utsibo chuiquid dapa Badac caidèn: 'Isadaidbo aquec cho,' cac comapenen tantiaquidèn Badan caidèn isadaidbo Nuquin Papan chiaid niacmenuequin chuitampampic. Aidèn chiacpadomboen Badac caidèn matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuen ambi papa quequin dasamboed nèish pichicaid pebededacno buampampic. Aden Nuquin Papan chiaid niac-niacmec icsamianquido mibèd iquec. Aido cuemepatecnèdan mimbi. ¹⁵ Adec nicadaitabo caido èbi tantiate shubun puduedash mibèdi cuèdèncuededec icsamiente bumpec. ¹⁶ Aidon chiaid tantienda. Èmbi chiaid mibi niac-niacmenushe. Aidobèd tabadènda. Mibi cuèdèncuededacno chomenda. Èmbi chuiboed niacbidansho isun con ana shècuènuèsh cueshqueboedèn chèshten cuesacbimboen mibi cuidtsiambique. ¹⁷ Nèbi èbi tantiaquido utsibotsen chuinu. Èmbi Pedcamo yacnocquido chuibocpadomboembidi con Mayanèn mibitsen tantiametsiashe. Pabiate cuembo icquin èmbi chuiboed tantiata. Chieshtoenquio icquin èbi tantiasho bèdambo icmendambi. Nuquin Papan isadaidbo mana caid pemedenequin dayun uacpadomboen mibi bèdamboen tabadmendambi. Adshumbic: 'Èmbi tantiaidquido yec èbi yacno puduedtequid nec,' queshun cuènote ushu menendambi. Abi cuèmèdquid icnubi utsi uain cuènquin aid cuènoten dada uatanquin menendambi. 'Èmbi meneboedènuidtsèqui ma isnu,' quequin adoendambi," quequin èmbi

Pedcamo yacnocquido chuiboed dada uata —
quequin chuiposhi Esusën.

Tiatida yacnocquido Esusën chiaid

18 Adoshombic aidëmbidi padpiden
chuoaposhi. Cuëte isquidbimboec aton ëshë
isquid-isquidquio yequi aton taë shocosh
piubimboec nac-nacpambo icposh. —Icsaisambo
yec Nuquin Papan Madombö nec. Adquid yec
abitedishun naid tantiaquidquio icquin matses
cuidquidquio nec —camenuc adquio isadquidën
naden chuiposhi. —Tiatida yacnocquidon ëbi
tantiaquidon iste ëmbi naden chuiboed dada
uata. 19 “Tantia, Tiatida yacnocquido. Mibitedi
chuinu. Mimbi naid abitedi tantiembi. Ëbi
tantiaquin mimbi utsibotsen bëdamboen tantiec.
'Aton Papabëdtan Esusën bëdamboenshë natsiash,'
quequin chieshtoenquio icquin mimbi ëbi
tantiec. Adquid icquin ëbi tantiamenuen utsibo
nashunquido mibi nec. Ëbi tantiesabon: 'Padi.
Esus tantienda,' caqui mimbi chieshtoenquio
icquin ëbi tantiapec. Tauamboen ëbi tantiaquin
daëdpactsëc naondaïdi nëbi ëbi tantiaquioshon
ëmbi chiacpadomboen mimbi dadpen naic.

20 Adec utsi-utsiec bëdambo icnubi icsamianquid
chido abi iquec. Aid mimbi cuemepatecnëdan.
Aid cuemenquio yec mibitedi icsaic. Mimbi
cacumiabi mibi iccuededacno isadaïdbo
tsusedpan chido Esabed caïdbimboecquid chido
icsamboshë icquid muanuec puduedposh.
Puduedshumbic: 'Nuquin Papan chiaid
chuiquid nebique. Tantia. Chuinu,' quequin
abi bunaiduidquio chuibanosh. Adoac ëbi

bèdiactsëc tantiauidtsëcboedi aidën chiacpadec icsacuededposh. Nuquin Papapenquoio utsibon papa caid tantiabededacno puduedposh. Adshumbic aidon papa quequin dasamboed nëish pichicaid pec tabadcuededquimbi aton chidopenquoio chudbededposh. ²¹ Adsho isun aid chido: ‘Ma abi icsaid ënu,’ queshun badedquoio cuidenquoio iccombi. Adoboqui abi icsaid ënte bunenquoio iccosh. ²² Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naid ënshoembi cuidenquoio ictsiac. ²³ Aid chido cuidquoiquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquiendambi. Ëmbi adosho isun ëbi tantiaquidtedishun: ‘Matsesën otacquoio tantiaid tantiaquidquoio Esus nec. Adquid icquin abi icsaid ënenquoio icquido cuidquin abi tantiaquido bëdambo icmendac,’ quequin tantiatsiash.

²⁴ Tantia. Ambocquido ëbi tantiaquidombotsen chuinu. Aden Satanasën chuimiaiðen chuisho: ‘Aden chuisho tantiatiapimbo iquebi,’ mimbi capoc. Aden bëdamboen nasho isun utsi chienquoio iquembi. ²⁵ Nëiduidtsëqui chuinu. Mimbi bëdamboen nabocpadomboen chieshtoenquoio icquin ëbi tantiata. Ëbi choabi yacpadembi adota. ²⁶ Choshombimbi chieshtoenquoio icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac. ²⁷ Aden Nuquin Papan aido ëbëdta chuiquid dapa

icmiacsho utsibon: ‘Dëniacquin ëmbiquen nanu,’ catiapimbo iquendac. Èbi chieshënquido: ‘Esus dëniacquin ëmbiquen matses namenu,’ quesho tantiashun matsu nacnenquidën ambi nacnenaid icsambo icsho isun pos-posacimboen cuidquiendambi. ²⁸ Badiadte anoentsëc uispa dapa choded-chodedbocpadquiec ënëdenquio yec ëbi tantiaquidobëd iquendabi. ²⁹ Èbi tantiaquido utsibotsen chuinu. Èmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin chuiposhi Esusèn.

3

Sadis yacnocquido Esusèn chiaid

¹ Adoshombic Nuquin Papan Mayan abi tantiaquidobëd tabadmequidquio icquin Esusèn padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedën naden chuiposhi. —Sadis yacnocquidon ëbi tantiaquidon iste ëmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bëdamboec tabadquido danquin utsibon: ‘Bëdambo icquido nec,’ mibi canubi ëmbien adotiapimbo iquec. Mibi bëdapenquio iquec. Unësacimboen mimbi ëbi bëdamboen tantienquio iquec. ² Isucunacimboen ëbi padpiden tantiaquiota. Nuquin Papan chiacpadomboen mimbi nauidtsëccoque. Mimbi

ëbi tantienquoio iqueque. ‘Nuquin Papan chiacpadquiec bédamboec tabadnuna. Esus tanti-aquionona,’ cananta. ³ Mimbi ëbi tantiabenon-dacpadomboen ëbi tantiaquiota. Bëpiscudenda. Nëbi mibi icsaid ënshun ëmbi chiacpadomboen naoata. Isucunenquoio yacbimboen ëbi tantienquoio icshoembi mibi cuidendac. ‘Ampequid choec,’ quequin tantienquoio yacbimboen ëmbi cuidte tantienquoio icsho mibi cuidtsiambique. Ëbi tantiaquiota.

⁴ Mibi yacno icsaquido dadpen tabadnubi utsi-utsiec daëdpactsëc ambi naid icsa ucudacbimboec icsainquoio yec bédamboec tabadec. Adec bëchish ucudacbimboec abi icsaid ënash bédamboec tabadsho isun ëbëdi tabadmequin icsaisa icmendambi. ⁵ Ëbi tantiaquido utsibotsen chuinu. Ëmbi chuibocpadquidën chieshtoenquoio icquin ëbi tantiasho adembidi bédamboen isun Nuquin Papa yacno ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoen-dambi Nuquin Papan abi yacnoshon uaido mayan bédabontsen tantianuc. Aden dada uaid ucudenquoio yacbimboen bëshunenquoio icquin ëbëdi tabadtequido abitedi tantiembi. ⁶ Ëmbi Sadis yacnocquido chuiboed Nuquin Papan Mayanën mibitsen tantiametsiashe. Pabiate cuembo icquin bédamboen tantiata. Chieshtoenquoio icquin ëbi tantiasho adembidi bédambo icmendambi,” quequin ëmbi chuiboed dada uata –quequin Esusèn chuiposhi.

Pidadepia yacnocquido Esusën chiaid

⁷ Adoshombic icsaisambo icquin ambi chiacpadomboen naquidënquio Esusën padpiden chuiposhi. Con tsusedpa Dabid yampicpadquid matses namequidquio yec ambentsëqui Nuquin Papa yacno puduedmequid nec utsibon: — Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnocquidon ëbi tantiaquidon iste ëmbi naden chuiboed dada uata. ⁸ “Tantia, Pidadepia yacnocquido. Mibitedi chuinu. Mimbi naid tantiembi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquio icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquio mibi iccoc. Adec chieshtoenquio icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. ⁹ Aden isadaidbon mibi ëmetiadquio iquec. Aido: ‘Con matses isadaidboudtsëqui Nuquin Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiaidombo mibi nec,’ aidon mibi caindac. ¹⁰ Ëmbi chiacpadec chieshtoenquio icquin ëbi tantisho isash mibi cudasendabi. ‘¿Ada Esus tantienquio yantsiashe? Tanu,’ queshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquio icquid icmendambi.

¹¹ Tantia. Nëbi choendabi. Utsibon chieshënaqui

mibi icbocpadquiech chieshtoenquio yec bëdamboec tabadta. ‘Ëbi adenquio icsho isun Esusën abi yacno puduedmenquio ictsiashi,’ quiash bëdamboec tabadta. ¹² Aden chieshtoenquio icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacbimboecnuc con shubun icquido mibi icmendambi auëshquio cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaquin ismepec? Adembidi abitedi ismequin: ‘Con Pabëdtan con matses nec,’ mibi caindambi. ‘Nuquin Papa yacno ëbi tabadaid Edusaden chuca caid abucuësh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi. ¹³ Ëmbi Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin Esusën chuiposhi.

Daudiseya yacnocquido Esusën chiaid

¹⁴ Adoshombic abitedishun naid tantiaquin abimbo chuiquidënquio Esusën padpiden chuioaposhi. Nidaidbëdta abitedi uaquidënquio abitedishun Icbon chuiposhi naden. —Daudiseya yacnocquidon ëbi tantiaquidon iste naden ëmbi chuiboed dada uata. “Tantia, Daudiseya yacnocquido. Mibitedi chuinu. ¹⁵ Mimbi naid tantiembi. Chieshtoenquio icquin ëbi

tantiaquid ictiadquidi adquidpenquoio mibi nec. ¿Ëbi bédamboen tantiaquido adopendactic? Padenquoio. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiashun: ‘Dayacquio yacimboen ëbi tantiaquiopashun,’ caimbi mibi. ¹⁶ Mibi adec chieshtonoc ëbitsen chieshtotiadquio iquebi. ‘Cacumiabimboen Nuquin Papa yacno ëbëdi mibi tabadmenquoio iquendambi,’ mibi catiadquio icchitebi. ¹⁷ ‘Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquoio yec bédambo iquebi,’ mibi quepoc. ‘Esus tantienquoio yec Nuquin Papabéd tabadtiapimbo icchitebi,’ quetiadquidi mibi adenquoio iccoc. Nuquin Papa yacno tabadte tantienquoio icsho isun mibi shubiuatiadquio iquebi. Bëchish ucabi yacimboen mibi icsaid ënabi icsho mibi bédamboen istiapimbo iquebi. Pacuënëdabimboen ëbi tantienquoio mimbi iquec. ¹⁸ Adboedëmbi Nuquin Papabéd tabadte bunquin ëbi tantiaquiota. Ëbi tantiaquin bëchish ucacimboen mibi icsaid ënta. Adsho icsaisabimboecnuc mibi bédamboen isquin ëbëdi tabadtequid icmetsiambique. Pacuënëdaid paposhquiabimboecnuc ëmbi naid mibi bédamboen tantiametsiambique. Ëbi tantiata.

¹⁹ Ëmbi tantiaido bédamboen tantiamembi. Aton papan: ‘Padi, mibi icsambo iquec,’ quequin bacuë ëmiabimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboen naid ënash

bëdamboec tabadta. ²⁰ Mibi tantiaquiembique. ‘Ëbi tantiata,’ ëmbi cac mibi: ‘Ai,’ quesho tantiash mibëd iquendabi. Pec tabadec bëisnaniacimboec mibëd iquendabi. ²¹ Tantia. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aibdëdi tabadquid nebi. Adquid yec aibdëdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbëdtan chuiquid icmendambi. ²² Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuiboed dada uata –quequin chuiposhi Esusèn.

4

Nuquin Papa Uanën isaid

¹ Asia yacnocquido Esusèn ëmbudquin chuibon abuc ispombi. Adshun isquien shëcuë shëcniacimboec isadpec. Adnubien chuibocpadquiec shoncacimboec comapenec onqueoaposh. –Nëmbo cho. “Nadquid iquendac. Nadotsiandac,” quequin mibi dadpen ismenu –caposhi.

² Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo chuiquid dapan tsadte dapanquo tsadpec. ³ –Chuiquid dapa

abentsëcquiobi nec. Bëdamboshë iquec –camenuec matses bunaidquio casëdubimboec nac-nacquio yec piumbo yec bëdamboshë isadposh. Abi tsadaid nënantanquio uenquebudpamboec uen podquedbipamboec umu-umupambo icposh. – Bëdamboshë icquidquio nec –camenuec adquio icposh. ⁴ Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquio dasiuidcuededposh. Chuiquid dapan mauetempo shocosh nacnenaidquio mauecuededposh. ⁵ Adnubien Nuquin Papa yacnuësh abubimboec bed-bedquetanenubien abu tesquianiacbimboec cuëdtoposh. – Abitedishun Icbombo nec –camenuec adec cuëdposh. Nuquin Papan bëntsiaucquio tabote taboaid 7tedi icnuc tabëcaid icposh. –Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiaquidobëdtsen icoaic –camenuen aden ismeposhi. ⁶ Bëntsiaucbidi actepenquio chian dapa acte-actectsëcquio isadposh.

Nuquin Papa tsadaid anoen daëdtsëcquio abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquio. Abimbouidquio istequidquio icposh. Cachoc icnubi tacbiduc adquiobidi icposh. ⁷ Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Ut-

sibic chiqui dapabimboec isadposh. ⁸ Icbombo aton podo uicchunën podobimboec 6tedi icposh. Podonotsen adquiobidi ëshëuidquoio isadposh. Podo ananquoio adquiobidi icposh. Aidonquiobi ënenquoio icquin Nuquin Papa chuiposh nadec cuëdënquin.

—Icsaisambo yec bëdamboshë icquidquoio mibi nec. Abitedishun Icbombo mibi icnuc mibipadquid utsi nibëdec.

Abitedimbo tantiaquidquoio mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquoio nec

—quec badiadquidën badiadquidënquiec cuëdënashic inchëshëntsen cuëdëndenenposh.

⁹ Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembidi: “Bëdambo iquec,” mibi cac bëdambo ictsiash, Papa —Nuquin Papa cadonenubi ¹⁰ tsusiobo 24ted icquido ambo tabadquido danëshën tinquebudcuededposh. Adtanquimbi mauete chicbededtanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbic aidontsen Nuquin Papa chuiposh nadec cuëdënquin.

¹¹ —Mibi bëdamboshë iquec, Papa. Adembidi abitedishun mibi: “Bëdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquoio mibi nec.

Comapenen tantiaquidquio icquin mimbi abited-
imbo uapampic.

Mimbi tantiacpadomboen mimbiuidtsēcquiobi
abitedi uapampic.

Adoac mimbi tantiacpadequi mimbi uaido
nibëdanabi yec abi iquec.

—quec tsusiobo cuëdëncuededposh.

5

Nuquin Papan chiacpadomboen namequid Esus isadaid

¹ Adshun isquien Nuquin Papan abiucshun
ambi chiaid dada uaid sanampec. Abiuc
daëdi dada uaid bidicabanquin: —Istemaidën
isnushe —queshun 7ted icnuc bitaccatempin
bitaccabanaid neposh.

² Adnubien Nuquin Papan abi yacnoshon uaid mayan bëda chuiquid
dapa comapenec onqueposh. —¿Tsuntsin nëid
dada uaid bedshun bitaccaid chicbanquin
chuibampatsiash? —quedo-quedoposh. —

¿Tsuntsin Nuquin Papan chiaid bedshun isquin
ambi chiacpadomboen naquin naimepatsiashba?
—quequin tantiec adposh.

³ Adoaquien
ëcbedanenquio icposh abitedimbo. Nëidic Nuquin
Papabëd tabadquidotedi. Nëidic nidaidën
tabadquidotedi. Nëidic unësaidotedi. Aidtedi
dada uaid bedshun bitaccaid chicbanquin
istequid nibëdposh.

⁴ Adsho isashini unësquio
icnuc shubipoc: —Aid dada uaid bedshun
chicbanquin chuibanquid nibëdec —quiash.

⁵ Adshobini anocquid tsusion: —Otac. Shubienda.
Ënëd. Is. Dada uaid bedshun chicbanquin

chuiبانquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac –caposhi.

⁶ Adoac isquien isadaidbon Nuquin Papa cuidmenquio icnuc abided unës uaid obeca bacuëbimboecquid Nuquin Papabëd abi tsadacnombo isadtsec. –Matses icsaid bedshunuec abided cuidadec unësaid Esusquio nec –camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi ëshëcquido dacuenadec tabadnuc abi uquëtsëc tsusiobouidquio dacuenadec tabadposh. Padnuc obecabimboecquid yec aton pais ⁷tedi icnuc aton ëshëmbo aidtedquiobidi icposh. – Abitedishun Icbombo yec utsin dëniacadiapimbo icquid Esusquio nec –camenuc aden pais ismeposhi. Adembidi: –Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdtiapimbo icquid Esus nec –camenuc ëshë ⁷tedi ismeposhi ushquin isacbimboecnuc. ⁷ Adshumbic obecabimboec isadboedën Esusën Nuquin Papan abiucshunquio sananaid dada uaid bedposh. ⁸ Bedsho istanequien dadanobi ëshëcquidobëd tsusiobo ²⁴ted icquido Esus ismec danëshën tinquebudcuededposh. –Bëdamboshë icquidquio mibi nec –quiash adcuededposh.

Tsusiobon icbo-icboen ten-tencate sananquimbi utsiucshun shocoshëmpi bëdambo nuadnuc tauitempi sanamposh. —Ëmbi ten-tencamequin Nuquin Papa cuishoncamiac bimboec Èsus tantiaquido cuëdënaid iquec —quequin aden ten-tencate sananquin ismeposhi. Adembidi: —Nëshun tauiac nëid pushudquid Nuquin Papa yacno nidac bimboec Esus tantiaquidon chianiaid iquec —quequin bëdambo nuadnuc tauitempi sananquin ismeposhi. ⁹ Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses cuidmenquio icnuec mibided cuidadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

¹⁰ Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadèn nidaidënuësh mibëdtan
chuiquid iquendac

—quec cuëdëncuededposh tsusiobo.

¹¹ Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi ëshëcquidouidquio dacuenadec tabadposh. Abi uquëctšëc dacuenadec tsusiobouidquio tabadposh. Aid uquëctšëc dacuenadequic mayan bëdabouidquio tabadposh. ¹² Adec tabadec mayan bëdabo abitedimbo cuëdëncuededposh naden chiec.

—Isadaidbon obeca bacuëded cuidachimboec mat-
ses icsaid bedshunuec abided cuidadec
Esus unëšpondash.

Esusquio bëdamboshë icquidquio nec.

Adquid icsho: “Abitedishun Icbo icquin Nuquin
Papan chiacpadomboen namequidquio
mibi nec,” abitedishun capashun.

Adembidi: “Mimbi uaido yec mitsana abitedimbo
nec.

Comapenen tantiaquid mibi icnuc mimbi tantiac-
maid utsi nibëdec,” abitedishun capashun.

Adembidi: “Mibi bëdamboshë iquéc. Mibi tanti-
aquiemi,” abitedishun capashun

—quec cuëdëncuededposh mayan bëdabo Esus
tantiec.

¹³ Adnubien Nuquin Papan uaido abitedimbo
cuëdëndocuededposh. Abi yacnocquidotedi
yec nidaidën icquidotedi yec unëšaid

uincuemiaidotedi yec acten icquidotedi yec quec
cuëdëncuededposh naden chiec.

—“Abitedishun Icbombo yec tsadte dapan
tsadquidquio Nuquin Papa bëdamboshë
iquec.

Obeca bacuëbimboecquid abided cuidadec unësaid
Esustsen bëdamboshë iquec,” canuna,
ënenquio icquin.

“Abiuidtsëqui Nuquin Icbo nec. Utsi adquid icti-
apimbo iquec.

Aidën nac nuqui bëdamboshë iquec.

Abipadquid utsi nibëdec,” canuna ënenquio icquin
—quec cuëdëncuededposh abitedimbo.

¹⁴ Adsho tantiash dadanobi ëshëcquido: —Ai,
abimbo caic —quenubi tsusiobo 24ted icquido:
—Nuquin Icbo bëdamboshë iqueque. Ismenu —
quetanec Nuquin Papabëdta Èsus ismec danëshën
tinquebudcuededposh.

6

Bitaccaid chicaid chiaid

¹ Adnubien Esusën Nuquin Papan: —
Nadoendambi —quequin chiaid dada uaid
7tedi bitaccaid tauamboen abentsëc chicposh
chicabi icquid 6tedi icnuc. Aid chicnubien
Nuquin Papabëd icquid dadanobi ëshëcquidën
abentsëcshun abu cuëdäcbimboec comapenec
cuëdquin: —Cho —caposh. ² Adoac cabayo
ushumbo icquid catsadec dada canti
sanampamboec chosho ispombi. Adec chosho
isun: —Mibi chieshënquido uesquin cuesun
secaquidquio mibi nec —quetanquin chuiquid

dapan mauetempo mauemeposh. Adoac adecbidi abi chieshënquido cuesun secanuec nidposh.

³ Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: — Cho —cac ⁴ cabayo piumbo icquid catsadec dada choposh. —Matses cuesun secananenquio icsho Nuquin Papan tantiapadomboen aidën nac matses abitedimbo matses utsibobëd cuesun secanandac —qeshun chështe dapa matses siante dapa meneposh. Adomboen Nuquin Papan matses cuidte tantiameposhi.

⁵ Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen pete yuë tante sanamposh. ⁶ Adnubien dadanobi ëshëcquido dacuenadec tabadnuc nënantanshunquio Nuquin Papan cabayo chëshëmbo icquid catsadquid chuiposh. —Piucquid dadpenquio meniac aton yuë daëdpactsëc nuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiposh. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquio icquin nata —quequin chuiposh. —Nuquin Papan cuidac adec pete nibëdnuc matses pete bunquiendac —quequin cuidte utsi aden ismeposhi.

⁷ Adnubien Esusën dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen

ënquimbi chuiquin: —Cho —cac ⁸ cabayo bëdiactsëc ushu-ushupactsëccquid catsadec dada choposh. —Aid matses unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

⁹ Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquio icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh. ¹⁰ Adoaido icquin comapenec cuëdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquio mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ¿tedectsicshun mimbi cuidpe? —caquin chuidoneposh. ¹¹ Adoaquien: —Chiata. Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin

Papan: –Ëbëdi tabadmequin icsaisa mibi icmambi –qeshun abitiombi dasiuidbudte ushumbo icquid dasiumbamposh.

¹² Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacimboec inchëshquio icposh. Inchëshën ushëbic intacimboec piumboshë isadposh. ¹³ Uispabic natiambo cunquenuc cuëte bacuë tididiquiacimboec nidaidën tididieposh. ¹⁴ Abubic dashcute bidiquiacimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. ¹⁵ Adsho isashien Esus tantiesabo abitedimbo: –Ashibi cuidpec –quetanec ompodec cuemposh. Nëidic chuiquid dapabo dadpenquio. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. ¹⁶ Ompoduidtsash: –Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe –quenubien utsibo: –Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided ciudadec

unësaid Esusëntsen cuidnushe. ¹⁷ Aidon ambi tantiacpadënquiobini nëbimbobi cuidchitec. Padtembo. ¿Tsutsi cuidenquio icpatsiashba? —queposh. —Nadomboen Nuquin Papan abi tantiaquido cuesun secaquido cuidendac — quequin aden ismeposhi.

7

Isadaidbo Nuquin Papa tantiaquidombo bësiaid

¹ Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquio icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenuc icsa uanushe —queshun adoposh. ² Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. ³ —Chiata. “Nidaid yec acte yec cuëte yec quenuc icsa uanushe,” queshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” queshun bësebambono —quetanquin Nuquin Papa tantiaquido bësebamposh ushë choacmiuësh choquidën.

⁴ Adshumbic ambi bësebamboed tambanquin chuibamposh. —Bëseboedtedi Acobo caidën

madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshè. ⁵ Nèidic Acobo caidèn mado Uda caidèn matses tsyuecquido 12,000tedi. Nèidic Acobon madobidi Duben caidèn matses tsyuecquido 12,000tedbidi. Nèidic Acobon madobidi Cad caidèn matses tsyuecquido 12,000tedbidi. ⁶ Nèidic Acobon madobidi Ased caidèn matses tsyuecquido aidtedquiobidi. Nèidic Acobon madobidi Netadi caidèn matses tsyuecquido aidtedquiobidi. Nèidic Acobon madobidi Manases caidèn matses tsyuecquido aidtedquiobidi. ⁷ Nèidic Acobon madobidi Simeyon caidèn matses tsyuecquido aidtedquiobidi. Nèidic Acobon madobidi Debi caidèn matses tsyuecquido aidtedquiobidi. Nèidic Acobon madobidi Isacad caidèn matses tsyuecquido aidtedquiobidi. ⁸ Nèidic Acobon madobidi Sabadon caidèn matses tsyuecquido aidtedquiobidi. Nèidic Acobon madobidi Ose caidèn matses tsyuecquido aidtedquiobidi. Nèidic Acobon madobidi Benamin caidèn matses tsyuecquido 12,000tedbidi. Aid abitedi tsinacquin tanac 144,000tedi icposh –quequin chuiposhi mayan bédan. Aden Nuquin Papabèdta Esus tantiaquido dadpenquioshè ismeposhi. — Adquido iquendac –quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bèseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshè tabadpec. Tambantiapimbo yactedi iquec. Nèidic

nidaid utsi-utsiec yacno tabadquido. Nèidic matses utsibo. Nèidic matsesquio. Aidededi Esus tantiaquido neposh. Nuquin Papa Esusbèd tabadacnombo tabadposh. Abèdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesèn chuiquid dapa ismiac bimboen: —Nuquin Papa bèdamboshè iqueque. Ismenu —quequin niste podobiecquid sananquin uic-uiccaposh. ¹⁰ Aido comapenec cuèdèncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuèded cuidac bimboen aton Mado Esuseded cuidpanèdash.

Adoac nuqui icsaid bedshunuec abided cuidadec unèspondash Esus.

Aid tantiasho icsaido cuidacno nidmenquio icquin nuqui abèdi tabadmec.

Aton Papabèd bèdamboshè iquec

—quec cuèdèncuededposh.

¹¹ Adsho tantiash ambo tabadquido mayan bèdabotedi danèshèn tinquebudcuededposh. —Nuquin Papabèd Esus abided cuidadaid bèdamboshè iqueque. Ismenuna —quiash adposh. Nènantanquio Nuquin Papabèd Esus tabadnuc abi uquèctsc dacuenadec dadanobi èshècquido 4tedi icquiduidquio tabadposh. Abi uquèctsc dacuenadec tsusiobo 24tedi icquiduidquio tabadnuc abi uquèctsc dacuenadequic mayan bèdabouidquio tabadposh. ¹² Aid mayan bèdabotedi danèshèn tinquebudcuededequi comapenec cuèdèncuededposh.

—Aden abi tantiaquido abèdi tabadmequid
bèdamboshè iquec.

Esusbèdi Nuquin Papa bèdamboshè iquec.

Adembidi abitedishun: “Mibi bèdambo iquec,
Papa,” quequin chuipashun.

Esusbèdi Nuquin Papa bèdamboshè iquec.

Abipadquid utsi nibèdec.

Comapenen tantiaquidquio icnuc ambi tantiac-
maid utsi nibèdec.

Aiduidtsèqui bèdamboen tantiaquidquio nec.

Aidèn nashunac bèdamboshè iquebi.

Nadatiambo icquid nec. Abitedishun Icbombo
nec.

“Esusbèd Nuquin Papa bèdamboshè iquec,” canuna
—quecuededposh mayan bèdabotedi.

¹³ Adshumbic èmbi 24ted icquid isboed
abentsècshun tsusion chuiposhi. —Ma ushumbo
icquid abitiombi dasiuidquido ¿tsutsi nepec?
¿Mitsiuëshquio aido chosh? —cac: ¹⁴ —Tsaudi,
tsusio. Mimbibien tantiec —capombi. Adsho
tantiash: —Tantia. Mibi chuinu. Satanasèn:
“¿Ada chieshtoenquio ictsiashe? Tanu,” qeshun
natiamboshè icmiac Esus tantiec chieshtoenquio
ictenedo nec. Adec chieshtoenquio icsho isun
Satanasèn tantiacpadomboen chieshèmèncuidon
unès uapondash. Abided cuidadec unèsaid Esus
tantiaquido icsho icsaisa icmiaido yec dashcute
ushumbo icquid dasiuidcuededposh. ¹⁵ Esus
tantiaquido icsho Nuquin Papan abi yacnombo
puduedmeshun aton yuabo icmepondash.
Adoac Nuquin Papa yacnombo tabadquimbi
abi ènenquio icquin tantiendac. Adembidi
Nuquin Papan: “Con mado mibi nec. Con

champi mibi nec. Nuquibi icnu. Cho,” qeshun abèdi tabadmequin bédamboen dayun uaic. 16-17 Isadaidbo matsesèn nèish yua obeca dadpen dayun uacpaden abided cuidadec unèsaidèn Esusèn abi tantiaquido bédamboenshè dayun uaindac padpidec unèstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuèsh ushèn pichiquenquio iquendac. Chun mèyadenquio iquendac. Nidaidènuèsh shubidenedi Nuquin Papa yacnuèsh shubitiapimbo iquendac. Natiamiante nibèdquiec iquendac. Unèsquio icmiante nibèdquiec iquendac. Bacuè shubisho anin bēucquin bédambo icmiacimboen abi yacnoshon Nuquin Papan Esus tantiaquido bédambouidquio icmendac — quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusèn nainquin dada uaid bitaccaid chicposh. Aden chicnubien Nuquin Papa yacnuèsh nadimbo icposh. — Dacuèdampambo iquec —quec media oda yec yuec-yuecpactsèc otacquo tantiec tabadposh. ² Adnubien Nuquin Papan abi yacnoshon uaido mayan bédabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. ³ Adnubien mayan bēda utsi ambobidi choposh. Choash bédambo nuadquid tauinuequin shocosh nacnenaaid tauite dapa dayun nidtuidposh. Shocoshèmpin

bèdamboshë nuadnuc tauitempi utsi sanamposh. Adsho isun bèdambo nuadquid nua meneposh. Adoac: —Nëid tauiac pushudquid Nuquin Papa yacno nidacbimboec Esus tantiaquidon chianiaid iquec —quequin bèdambo nuadquid sanshun tauite nacnenaid dapan tauiposh bèdambo nuadnuc. ⁴ Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantishun Nuquin Papan abi tantiaquido chieshënkuido cuidendac —quequin aden ismeposhi. ⁵ Adshumbic aid mayan bèdan tauite dapan samëdquid cuëte dëtsisadaid isquidquio icquid bedshun shocoshëmpin sandoposh. Aden sandotanguimbic shocoshëmpichobi matses tabadacno masiabudposh. Nuquin Papa tabadacnoshon adoposh. Adnubien bedbedquetanepamboec abu tesquianiabimboec cuëdtoposh. Adnubien nidaid abichobi sacasacaquemboec uëdëqueposh. —“Nuquin Papan ëbi chieshënkuido cuidpashun,” quequin Esus tantiaquidon chianesho tantishun aden Nuquin Papan comapenen cuidendac —quequin aden ismeposhi.

Shoncate shoncaquin ismiaid

⁶ Matses tabadacno cuëte dëtsisadaid isquidquio icquid masiabudnubien shoncate bedboedon mayan bèdabon shoncanuen sanamposh. ⁷ Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuëte dëtsisadaid isquidquio icquid

yec intac yec quenuc chomeposh ue dapa choachimboecnuc. Aden chomiaidèn nidaid nuamboshë taidposh. Cuëte dadpenquioshë taidposh. Uasin dadpenquioshë pichiqueposh.

⁸ Adnubien mayan bëda utsin shoncaposh 5tedishun shoncabi icnuc. Shoncanubien macuësh dpatembi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. ⁹ Adec intac yanaidèn acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

¹⁰ Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nëdën-nëdënquepamboec abucuësh budec acte nëpaëdposh. Aid acte nëpaëdboedèn acte utsi-utsiec dadpenquioshë actiapimbo yamposh. ¹¹ Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

¹² Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoaquien bëdambo chënqueboedi bëdiactsëcquio chënquiansëccosh.

¹³ —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësqioshë iquec. Shoncabi icboedon mayan

bèda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac –quec cuëdcuemposh abuc cuenequi.

9

Mayan bèda utsin shoncanuc isaid

¹ Adnubien chiqui dapan chiacpadomboen mayan bèda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bèda badedquio budash matses yacno choposh. Adsho isun Nuquin Papan chiacpadomboen bëtashte chictempï meneposh. Podobitsi icsabo uidën uacno nidaid shëcuë uquëducquio icquid bëtashte chicte neposh. ² Aid chictempin chicaquien uquëducuësh tied nëdënquedoachipamboec pushudtoposh. Abuc inchëshquio pushudquid icnuc ushë isadenquio icposh. ³ Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquio niosh. ⁴ Adsho isun aido chuiposh. Aton petembo caic: –Nuquin Papan tantiacpadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquidoidquio sebudneta –quequin chuiposh. ⁵ Adshumbic: –Unësnuc seshun secainda. Inchëshën ushë 5tedi nidmequin chichunën siacbimboecnuc sebudneta –cac tsectsebiecquidën sebudnequin ismeposhi. ⁶ Aid tsectsebiecquidën siac

natiamboshë yec mates unëste bunquiendac. Unëste bunquidi badedi unësenquo iquendac.

⁷ Aden tsectsecbiecquid ismeposhi. ¿Mitsipadquo nidaid cudasquid sondado catsadaid cabayo icpec? Adquo cabayobimboec tsectsecbiecquid isadposh. Shocosh mauetebimboecquid mauecuededposh. Matesèn bêtantetembobi bëisadposh. ⁸ Chidon tëbucshumbimboec isadposh. Bëdin shëtabimboec aton shëta icposh. ⁹ Bëntsiauc shicdiadquid cudaste shocosh nacnenaibimboec sictsasimbo icposh. Aid abi maisi cuensho tantiac tied nëdënquiacbimboec comapenec cuëdposh. ¹⁰ Aid tsectsecbiecquid chishpichoquid yec chichumbimboec sianquidquo neposh. Inchëshën ushë 5tedi nidmequin adquidën dadpenshun natiamboshë icnuc mates sebudneposh. ¹¹ Abi nidmequid aton icbo Satanasèn yuaido uidën uacnuësh choquidbidi niosh. —Unës uanquidquo nec —quequin isadaidbon onqueten abadon caposh. Quidieco matesèn onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³ Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiauc tsadunaid yacnuëshquo onquedoshon tantiombi. ¹⁴ Adec onquequidën nëbi shoncaboed chuiposh. —Acte dapa

Eupëdates caid yacnoshon matses cuidquido mayan bédabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan –caquien chuitamposh. ¹⁵ Aden chuitanac aid mayan bédabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: –Adënquiobi adoendac –quequin tantiacpadomboen adoposh. ¹⁶ Adoaquien ambi namiaido cabayo catsadquido sondado chedo matses utsibo cuesun secanuec choposh. Aido tambanaidtedi chuisho tantiombi. –Dadpenquioshë iquec cuëte podotedi. 200,000,000tedi iquec –queposh.

¹⁷ Ëmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bëdi dapan mapibimboec isadposh. Ana shëcuënuësh nëdënquepamboec pushud-pushudpambo yec choposh. Cachinan bacuë pisenaid nuadac bimboec asupede caid icsamboshë nuadposh. ¹⁸ Adshumbien ana shëcuënuësh choaidën matses dadpenquioshë cuesun secabudneposh. ¹⁹ Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidëntsen matses dadpenquioshë unës uabudnequin ismeposhi.

²⁰ Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo

icposh. Ambi naiduidi nabamposh. Èntiadquidi abi icsaquioposh. Nuquin Papa tantienquo icquin podobitsi icsabo tantiaquin èntiapimbo icposh. Adembidi ambibi nacnenaïd ambi papa caid ènenquo icquin tantiaposh. Utsibon shocosh nacnenaïd tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaïd anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquo icquin Esusquo tantiatiadquidi ambi nacnenaïduidi tantiaposh. ²¹ Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi mases dadpen unës uabudneposh. Aton chidopenquo chudquidombic adembi utsi chudshumbedposh. Adembidi aton bënëpenquo chudmequidën abi icsaid èntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec mases abitedi: —Nuquin Papan cuidnushe. Èbi icsaid ènu —quetiadquidobi adenquo icposh.

10

Mayan bēdan dada uaidēmpi pemiaid

¹ Cabayo uinsadpambo icquid ismeboshombic utsitsen ismeposhi. Adoac mayan bēda chuiquid dapa utsi dacuēdampambo icquidquo Nuquin Papa yacnuëshquo budsho ispombi. Abu ushubimboec isadec abitiombi dasiuidbudpacosh. Uen podqued uenquebudacpamboec

mapino icposh. Ushëbimboec bêtantete
 bëchamauanquieposh. Buintad nitsinaid
 nëdënquiacbipamboec isquid-isquidpambo nidte
 icposh. ² Dada uaidëmpi bëcadotsaid sanamposh.
 Budash nidtuidposh. Tsiembudcuenshun taë
 abiucshun chian dapa mad caid nëtıncaquimbi taë
 opiocshon mananuc tincaposh. Ënapenquioshë
 icquid niosh. ³ Adashien bëdi noshquiacbimboec
 nuamboshë cuëdtoposh. Adec cuëdquin chiac
 abu 7tedec cuëdtonequin ëcbedtoneposh Nuquin
 Papan chiaid chuiquin. ⁴ Aden abu cuëdquin
 ëcbedtonesho tantiaashun: —Abu cuëdquin chiaid
 dada uanu —qeshobi: —Padi —caposhi Nuquin
 Papa yacnoshon chuiquin. —Abu cuëdquin
 chiaidtedi dada uainda. Padi. Utsibo chuiquin
 dada uainda —caposhi. Adoac dada uainquio
 iccombi.

⁵ Adnubien mayan bëda tsiembudcuenshun
 chian dapa nëtıncaquin utsiucshun mananuc
 tincaboedën ambibi podo abiucquio cadoposh.
 —Nuquin Papan isnubi abimbo chuiquidquio
 nebi —quequin tantiamenuen aden ambibi podo
 abiucquio cadoposh. ⁶ Adotanquin chuiposhi.
 —Tantia. Mibi chuinu. ¿Tsutsi nidaid uabi yec
 ëndenquimboshë icpampic? Aidi Nuquin Papa
 nëbi adquid yec nibëdantiapimbo iquendac.
 Adquid icquin abitedi uapampic. Abu uashun
 aidën icquidtedi uapampic. Nidaid uashun
 aidën icquidtedi uapampic. Acte uashun aidën
 icquidtedi uapampic. Aden abitedi uaquidën
 chiaidquio chuinu. Nëbi Nuquin Papan ambi
 tantiacpadomboen icsambo icquido cuidquimbi
 abi tantiaquido abëdi tabadmendac. ⁷ Èbi padquid

mayan bēda utsin shoncate sanamboedën: “Nēbi nainquin shoncanu,” cacpadënquo Nuquin Papan ambi chiampicpadomboen adoendac —queposh mayan bēda chuiquid dapa dacuēdampambo icquid Nuquin Papan matses cuidquin naimpanuda.

⁸ Adnubini abucuēsh cuēdquidën chuiposh. — Aid mayan bēdan sanamboed dada uaid bed —cac: ⁹ —Dada uaid beccho —capombi. Adoaquien: —Nē bed. Bedshun che. Batambo icboedi min ana mucambo yanendac —caposhi. —Nēid bedshun chiacbimboen Nuquin Papan chiaid cuishonquequin isban-isbanash mucambo yanacbimboec Nuquin Papan cuidte tantiash shubitiadquo mibi yanendac —quequin tantiamenuen aden chuiposhi.

¹⁰ Adoac aid bedshun chiash adquo yanobi.

¹¹ Adquo yansho isun mayan bēdabo chuiquid dapan chuioaposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebēdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bēdabo chuiquid dapan.

11

Nuquin Papan namiaidon daēdshun naid

¹ —Nuquin Papan tantiacpadomboen mimbi chuibanendac —quequin chuishumbic mayan bēda chuiquid dapan piabimboecquid tambante meneposhi. Adotanquin naden chuioaposhi. — Edusaden yacno nidshun Nuquin Papa tabadte shubu uashunaid tambanta. Adotanquimbic

Nuquin Papa tantiaquin bēdambo nuadnuc tauinuequin nacnenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. ² Shubu nuntanquio tambanshun umanucquid daquēnē uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsē chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquēnē uaidēn pudued-puduedendac,” qeshun aid shubu daquēnē uaid tambanenda. Aden Edusaden icsa uaqin seta 3tedi matamendac —quequin chuiposhi. — “Muainquio icquin Esusbēdta ēbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³ Adnubini Nuquin Papan chuiposh. —Aden Edusaden icsa uanubi matses daēdquiobi ēmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsē chotsecnuc matamequin ēmbi chiacpadomboen chuibanendac. Adquid yec: “Matses abitedi icsamboshē icsho isash shubitiadquio iquebi,” quequin icsambo icquid abi icsaid ēmenuec dashcute icsactsēcquidquio dasiuidendac — quequin Nuquin Papan chuiposhi.

⁴ Adshobini mayan bēdan chuioaposh. — Aido Nuquin Papan oncamiaid daēd isadaidbo matses tsusedpan chuipampid nendac. “Nuquin Papan bēntsiauc cuēte odibos caid nitsinaid daēd bēdambo icquid iquendac. Ambobidi

tabote daëd bēdambo icquid iquendac,” quequin chuipampid nendac. “Nuquin Papan Mayanën tantiamiaidquoio icquin ambi chiaidquoio chuibanendac,” camenuen aden chuipampic.
⁵ Aden abi chuibansho abi chieshēnquidēn: “Mibi cuesunenu,” caqui cuesuniadenquoio iquendac. Nuquin Papan dayun uaid icquin ana shēcuēnuēsh choboedēn nibēdquiecnuc pichicacimboen abi cuesunenuequivotedi unēs uaindac. Nuquin Papan cuidte tantiamenuen adoendac. ⁶ Adembidi Nuquin Papan cuidte tantiamenuen Nuquin Papan Mayanën namiaidquoio icquin comapenen tantiaquin ismebanendac. Aden ismequin nac abi nidabi yacpadequi ue choenquoio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuēdampamboecquin matses shubimendac Nuquin Papan cuidte tantiamenuen.

⁷ Aden Nuquin Papan chiaidtedi aid daēdshun nainquin naindac. Aden nainshobien matses chuiquid icsamboshē icquidēn bēdi dapabimboecquidēn abidaēdi cuesun secaindac. Satanasēn namiacpadomboen adoendac.
⁸ Edusaden yacnoshon cuesun secashun chococainquoio iquendac. “Ma cuesun secaid ischitono,” queshun chococainquoio icquin podqued ansanendac. Nuquin Icho Esus cuesten dectanacnoshonquoio matsesēn adoendac. Equipito yacno icpampido yec Sodoma yacno icpampido yec quequidbimboec icsamboshē icquin aden Nuquin Papan chiaid

chuibanquido cuesun secaindac. ⁹⁻¹⁰ Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abèd icquidobèd menenancuededendac. Matses abitedimbo caimbi. Nèidic matsesquio. Nèidic mayu. Nèidic nidaid utsi-utsiec yacno tabadquido. Aidedi menenancuededendac. Abentsë chotsec ushquin aden ambi cuesun secaboed isbededec tabadendac –quequin chuiposhi mayan bèdan.

¹¹ Adashic abi onquec: –Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiasho isash cuishonqueboedobi natia dacuèdec tabadendac. ¹² Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënquidon isnubi adendac. ¹³ Aid daëd abuctonoc nidaid sacasacquemboec natiambo uèdèquianendac. Nidaid uèdèquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuèdcuededendac. Dacuèdequi: “Nuquin Papa dacuèdampamboecquidëmbien nash. Aidquien tantiatad,” quecuededendac –quequin chuiposhi mayan bèdan. ¹⁴ Aden chiqui dapan chuibocpadomboen mayan bèdan Nuquin Papan cuidte utsi chuiposhi. Nainquin chiabi iccoshi.

Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daëd chui-bombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec. —Nuquin Papabëdi aton Mado Esuquidistu abided cuidadec unësaid bëdamboshë iquec.

Abi chieshënquidon naid ëmeshun aid abentsëcshumbi matses abitedimbo namendac ënenquo icquin.

Abitedishun Icho nec —quec cuëdëncuededposh. ¹⁶ Adashic Nuquin Papa yacnombo icho-ichoc tsadten tabadboedobi tsusiobo 24tedi icquido: —Mibi bëdamboshë iquec —quequin ismec danëshën tinquebudcuededposh.

¹⁷ Adtanequi nadec cuëdëncuededposh.

—Nidaid uabi yec ëndenquimboshë mibi icpampic, Papa.

Nëbi adquid yec nibëdantiapimbo icquid mibi nec.

Abitedishun Icbombo mibi icnuc:

“Ëmbiquen dëniacquin namenu,” Satanasën catiapimbo mibi iquec.

Nadatiambo icquid icquin mimbentsëqui matses abitedimbo mimbi namendac.

¹⁸ Nidaid utsi-utsiec yacno tabadquidon abi chuiquidobëdtan mibi chieshëndenec.

Mimbi uaidtedi icsa uadenec.

Adsho mimbi tantiacpadënquo nëbi mimbi cuidendac.

Matses abitedi uincuemetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobëdta
mibi tantiaquido abitedimbo mibi yacno
mibëdi mimbi tabadmendac.

Chuiquid dapambobëdta chuiquidpenquio mibi
tantiaquidotedi bëdambo icmequin mimbi
adoendac

—quequin tsusiobon Nuquin Papa chuisho tanti-
apombi ushquin isacimboen.

¹⁹ Adshun isquien Nuquin Papa yacnombo
con matses isadaidbon Nuquin Papa tabadte
shubu uashunampid shëcniacchobi icposh. Aid
shubu nuntan isaquien Moisesën ambi nacnenaid
Nuquin Papan chiaid sandoampid icposh. —
Ëndenquimboshë ambi chiampicpadomboen
Nuquin Papan ambi tantiaidtedi nainquin
naindac —camenuen aden ismeposhi.
Aden ëbi ismenubien bed-bedquetanec abu
teshquianiacbimboec nua cuëdtoneposh. Nidaid
saca-sacaquemboec uëdëqueposh. Ue dapa
nuamboshë choachimboec ue tsasi choposh.
—Nuquin Papambo abitedishun Icbombo nec
—camenuen aden ismeposhi Nuquin Papa
yacnoshon.

12

Chidobëdta nisibimboecquid dapa ismiaid

¹ Adoshombic Nuquin Papa yacnoshombidi
utsitsen dacuëdampamboecquidbidi ismeoaposhi.
Adoac chido ushë dasiuidacximboec
bëchamauanquiecscho ispombi. Inchëshën ushë
tincash tsadposh. Uispa 12tedi nacnenaid
mauete maueposh. ² Bacuë nua usunec
tishtiadtsëcquio yec shubibud-shubibudposh.

—Isadaidbon chido Esus tishquid nec —camenuen aden ismeposhi. ³ Adnubien nisibimboecquid nuamboshè icquid choposh. Taèchopaidquio yec piumboshè icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauecuededposh. Satanas niosh. ⁴ Adshumbic nisibimboecquidèn aton incuente ènapen icquid uic-uiccaquin uispa dadpen bedshun nidaidèn siabudposh. —Aden Nuquin Papabèd icquin Satanasèn abipadquido utsibo mayan bédabo icboedo utsi-utsien yuapampic. Aden yuash aton yuabobèdi nidaidèn choshon matsetsen icsamete bunquiec —camenuen aden ismeposhi. Adshumbic chidon tishacsho bacuè penuen auidi bèsquin cainuidposh. ⁵ Adnubien chidon dada bacuè tishposh. Bèdambo icquid matses abitedishun Icho ictequidèmpi niosh. Adshobien Nuquin Papan abi yacnombo buamposh nisibimboecquidèn petiapimbo icnuc. Buanshumbic abipadquid abitedishun Icbombo icmiac. —Aden Satanasèn Esus nibèdametiapimbo iquec —quequin ismeposhi. ⁶ Adnubien chido nèbi bacuè tishboed nisibimboecquid dapa cuenènec matses nibèdacnombo Nuquin Papan tantiacnombo nidposh. Ambobi tabadsho isun Nuquin Papan bèdamboen dayun uaposh yuenquio seta abentsè chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nèidtedi isoapombi. Nèidic nisibimboecquid dapa Satanasquiobi. Nèidic mayan bédabo icboedobi Nuquin Papan chiaid

niac-niaquec icsash podobitsi icsabo yanaido Satanasèn yuaido. Nèidic Nuquin Papabèd icquidombo mayan bédabo dadpen. Nèidic aido chuiquid dapambo Miqued caid. Aidedi ispombi. Adnubien Satanash nadposh. —Aton yuabo mayan bédabo cuemiash Nuquin Papa dèniaquec èbimbo abitedishun icbo yantsiabi —quiash nicantiadquo icposh. Satanash chedo nidaidèn nidmiabi icnuc neposh. ⁸ Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidènquo icquido yec niadenquo icposh. Adshumbic Miqued chedon nisibimboecquid Satanash chedo nicaposh. Aton yuabobèdta Nuquin Papa yacnoshon nicaposh. ⁹ Nicaquien matses tabadacno nidaidèn choec Satanash chedo bud-budposh. Eba caid icsamepampid Satanash niosh. Nèbi matses dadpenquioshè icsamequin yuate bunquiec.

¹⁰ Adnubien Nuquin Papa tabadacnoshon anocquidèn comapenec onquequin chuibamposh naden chuiquin.

—Aden Nuquin Papan aton Mado Esusbèdtan abi dèniacnuequido dèniacmenquo icposh.

Nuquin Papa chieshènquidquo icquin abi tantiaquido chieshènquin icsamboen chuishunquid nec.

“¿Esus tantiaquido bédambo icquidoda nedic? Èmbi natiamiac aido chieshtotsiash,” quequin Nuquin Papa chuidenequid Satanash nec.

Satanash chedo cuemiash Nuquin Papa aton Mado Esus abided cuidadec unèsaidbèdi

dëniacdtiapimbo yec abitedishun Icbombo
nec

—queposh Nuquin Papa yacnuësh cuëdec.

¹¹ Adashic padpidec auëshbidi:

—Nëbi ëmbi isac Satanasën Esus tantiaquido
chieshtometiapimbo icposh.

Satanasën: “Chieshtomenu,” caqui:

“Padi. Esusën yuambo nebi,” quec chieshtoenquo
icposh.

Cuidmenquo icnuec abided ciudadec unësaid
Esus tantiec chieshtoenquo icposh.

Adsho abi chieshënquidon matsesën: “Padi. Esus
tantienda. Cueschitomane,” caqui

chieshtoenquo icquin adenuidi Esus tantiasho
cuesun secameposh Satanasën aton yua
icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuis-
honquenuna.

Ëbitedi cuishonquenuc nidaidën tabadquido mat-
ses yec mibi cuishonquetiapimbo iquec.

Nëshun cuemiac mibi yacno budash Nuquin Papa
chieshënquieç Satanas chieshëmënquieç
tabadec.

Mibi icsamete bunquieç. “Nëbi Nuquin Papan ëbi
cuidquieque.

Abi tantiaquido yuashunchitono,” quec mibi ic-
samete bunquin mibi natiambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden
tantiameposhi.

¹³ Adshumbic ëmbi isadaidbon chido isboed
padpiden ismeposhi. Adoac Esus tishquid
isadaidbon chido unës uanuen nadancasho

ispombi. —Nuquin Papa yacnoshon nicachitoshi —qeshun chieshënquin nisibimboecquid Satanasën aid chido nadancaposh. ¹⁴ Adnubien Nuquin Papan chiqui dapan podobiecquid meniac bedanec aid podombi cuenec matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh. ¹⁵ Adnubien nisibimboecquidën: —Aid chido unës uachitono —quequin ambibi ana shëcuënsnun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adembidi Esus tantiaquido nibëdametiadquio iquec. ¹⁶ Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido yacno chiuidenquio icnuc. ¹⁷⁻¹⁸ Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bëdamboen naquido Esus tantiaquido caimbi.

13

Bëdibimboecquid dapa ismiaid

¹ Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi

icposh. –Nuquin Papa caid nibèdquiec. Èbiuidtsèqui abitedishun icbombo icnu –quequin aton mapitedi bédada uadaid neposh. Pais 10tedi icposh. Aid paistedi chuiquid dapan mauete paisèn dectambampaccosh. ² Aton dada bēdin dadabimboec isadposh. Aton taë uinsadpambo icquid utsi oso caidèn taëbimboec isadposh. Ana shècuë bēdi utsi tēbuchoquidèn ana shècuëbimboec icposh. Adsho isun Satanasèn ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasèn matses icsamboshē icquid chuiquid dapa icmequin ismeposhi. ³ Adshumbic padpiden ismeposhi. Adoac aid bēdi dapabimboecquid acte uquēducuēsh choboedèn mapi abentsēc mēmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: –Comapenen tantiaquidien nechitec –queshun matses abitedishun acte uquēducuēsh choboedèn chuiquid icsamboshē icquidèn chiacpadomboenuidi nabededposh. ⁴ Adshumbic: –Èbi chuiquid dapa namequid mibi nec –quequin Satanas papa caquin matsesèn tantiabededposh. –Aden Satanasèn namiac èbi chuiquid dapapadquid utsi nibēdec. Comapenen tantiaquidquio icnuc utsibon nuqui cuesun secatiapimbo iquec –queshun abi chuiquid dapa acte uquēducuēsh choboedtsen tantiaquioposh. ⁵ Aden matsesèn tantiaid icquin Satanasèn tantiamiacpadomboen Nuquin Papa chieshènquiec: –Nuquin Papa

caid nibèdquieç. Ëmbiuidtsëqui namembi — quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. ⁶ Aidën Nuquin Papa chieshënquin naden muauaposh. —Nuquin Papa caid nibèdquieç. Abi tabadaidtsen nibèdquieç. Abi yacno tabadquido abitedi nibèdquieç. Ambembi chiaid niosh —quec muaposh. ⁷ Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isacbimboecnuc ismeposhi. ⁸ Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

⁹ Pabiate cuembo icquin bëdamboen tantia. Esus tantiaquido icsho mibi chuinu. ¹⁰ Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantiaash mimbi nacpadequi chieshtoenquio icta. Chieshtoenquio icquin Esus tantiaquin ambi chiacpadomboenuidi nabanta.

Nidaid shëcuënuësh choboedtsen ismiaid

¹¹ Adshumbic padpiden ismeposhi. Adoac aben icquidbimboecquid utsitsen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh. ¹² Adsho isun Satanasën abia chuiquid dapa icmeboedën nidaid shëcuënuësh puduemboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. — Seshuniaid uincuemiondaidën nuqui chuiquid dapan chiaiduidtsëqui natiad —caposh. ¹³ Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenshun isnubi abucshun abembi taboadaid budmequin ismeposh. ¹⁴ Aden Satanasën namiacpadomboen comapenen tantiaquin ismiac matses dadpenshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Papambo tantienquio icquin. Abi chuiquid tantiamequid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacnenta —cac matsesën nacnemposh. ¹⁵ Nacnenacsho isun Satanasën namiacpadomboen nidaid shëcuënuësh choboedën abi chuiquid dapabimboecnuc nacnemboedi tibocameshun oncameposh.

Adoaquien nacnemboedquiobi chuiquid dapa icsabimboec onquequin: –Èbi tantiesabo neque. Cuesun secatan –cac yuabon abi chuiquid dapa tantiesabo cuesun secatamposh. ¹⁶ Adnubien nidaid shëcuënuësh choboedën: –Nuqui chuiquid dapan yuabo nuqui nec –quequin ancabudquin matses dadpenquoio dada uaquin bësiadmeposh nëidtedi. Nëidic chuiquid dapabo. Nëidic chuiquidpenquoio. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquoio. Aidtedi matses dadpenquioshë dada uaquin bësiadmeposh. Utsi-utsien bëtanteteno bësiadmeposh. Utsi-utsien mëdante abiucquoio mësiadmeposh. –Acte uguëducuësh choboedën ëbi chuiquid dapan yuabo nec –queshun nameposh. ¹⁷ Adshumbic nidaid shëcuënuësh choboedën chuiposh. –Adec ëmbi chiacpadec siadambo icquido piucquidbëdta mitsana utsi menenda. Èmbi siadmiaiduidtsëqui mene –queposh. Utsi-utsiec abi chuiquid icsamboshë icquid cuëmëdquid dada uaquin bësiadmiaid neposh. Utsi-utsiec aid cuëmëdaidbimboecquid naden 666 dada uaquin bësiadmiaid neposh. ¹⁸ ¿Ada ëmbi chuiboed tantio? Bëdamboen tantiaquidën: –Abi cuëmëdquidquoio chienquoio icquin naden 666 chuiquin dada uapac –catsiash. –Adec matses icsamboshë icquidquoio chuiquid dapa yansho isun bëdambo icquid danenda –quequin ushquin isacbimboecnuc aden ismeposhi.

14

Nuquin Papan cudasënaido ismiaid

¹ Adoshombic padpiden ismiac abided cuidadec unësaid Esusquio macuësh dapa Sion caid mananënquio tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaquin bësemiaido niosh. —Adec Esus tantiaquido abëdi tabadendac —quequin aden ismeposhi. ² Adnubien Nuquin Papa yacnuësh ¿midapadpamboec cuëdtoposh? Acte nua chododoquiacbipamboequien niacbiposh. Abu tesquianiacbipamboequien nechitosh. Ten-tencate dapa dadpen icbo-icboen sananquin ten-tencacbipamboec comapenec cuëdëncuededposh. ³ Adec Esusbëdi macuësh mananënquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdtan dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided cuidadec unësaid Esus tantiaquidon matsesënuidtsëqui aid cuëdënte chuca tantiec cuëdënosh. ⁴ Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatipimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh.

⁵ Chieshtoenquo icquin Esus tantiec muesabo icpanëdash. —Adquido iquendac —quequin ushquin isacbimboecnuc aden ismeposhi.

Mayan bëda utsi 3tedshun chiaid

⁶ Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacbimboec abuc cuensho ispombi. Bënuytiapimbo icquid Nuquin Papan chiaidquo matses chuinuec niosh nëidtedi. Nëidic matsesquo. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh. ⁷ Abuc cuenquimbi chuibemposh. —Nuquin Papauidsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquo iquec,” quequin tantiata. Nëbi ambi chiaid niac-niacquido cuidquieque. Aidquo tantiata —quequin chuibemposh abuc cuenquimbi.

⁸ Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcacbimboen matses utsibo abitedi Nuquin Papa tantiamenquo icquin icsamequiosh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

⁹ Adnubien mayan bëda utsitsen abuc cuenoaposh. Aidëntsen chuibenaposh. —Tantia. Nuquin Papan cuidtequido chuinu. Chuiquid

dapa icsamboshë icquid acte uquëducuësh choboed tantiaquin aidbimboecnuc nacnenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiacpadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. ¹⁰ Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided ciudadec unësaid Esusënquio mayan bëdabobëdtan isnubi adoendac. ¹¹ Ènenquio icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquio icquin adembi cuidquiendac ènenquio icquin –quequin chuibemposh mayan bëdan. Aden ismeposhi.

¹² Èmbi chuiboed tantiashun mimbi nabocpadomboembi chieshtoenquio icquin Esus tantiaquin ambi chiacpadomboenuidi nabanta. Ut-sibon chieshënquin: –Padi. Esus tantienda. Cueschitomane –caqui adenuidi ènenquio icquin Nuquin Papabëdta Esus tantiaquiota.

¹³ Adnubi Nuquin Papa yacnuësh comapenec onquequin chuioaposhi. –Naden chuiquin dada uata. Chieshëmënquidon: “Esus tantiec,” qeshun cuesun secaido Esus tantiaquido cuishonquendac –quequin chuiposhi. Adnubien Nuquin Papan Mayanëntsen: –Ai, abimbo caosh. Esus tantiaquido natiaic tabadtenedobi unësash

bëdamboshë iquendac shubitiapimbo yacno tabadec. Ambi chiacpadquiec bëdamboec tabadec unësacsho Nuquin Papan aden bëdamboshë icmendac –quequin chuiposhi.

Intac nua icnuc Nuquin Papan cuidtequid chiaid

¹⁴ Adoshombic padpiden ismiac abu ushunquio Esus tsadsho ispombi. –Abitedishun Icbombo nebi –quec chuiquid dapan mauetembo shocosh nacnenaïd maueshun chështebimboecquid sanamposh. ¹⁵ Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. –Nëbi nidaidën icquid sinaïd butebanquin sando. Nuquin Papan tantiacpadën nëbimbobi nata ¹⁶ –caquien chështebimboecquidën sinaïd butebanquin sandoposh. –Aden Nuquin Papan tantiacpadomboen abi tantiaquidotedi bedshun abi yacno Esusën buanendac –camenuen aden ismeposhi.

¹⁷ Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec. ¹⁸ Adec chështebimboecquid sanampamboec choshobien mayan bëda utsin matses tabadacno cuëte dëtsisadaïd isquidquio icquid nidaid masiabudboedën tauite dapa dayunuëshquio choshon comapenec cuëdquin chuiposh. –Shancuinbimboecquid uba caïd nidaidën caniquid chështebimboecquidën mëtebanquin sandoshon buanshun uba tish-tishten sando ¹⁹⁻²⁰ –caquien uba caïd mëtebanquin sandoshon buanshun uba tish-tishten sandoposh. Aden abi tish-tishten sandoshon taën tintincaquin tish-tishaquien ënë nuamboshë

yec piumbo icposh. –Intac nuambo icnuc Nuquin Papan cuidendac –camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesën intac chëuëdsho isombi ushquin isacbimboen. – Aden Nuquin Papan abi chieshënquido cuidendac –quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icscho ispombi. Mayan bëdabo niosh. –Aidon ambi chiacpadomboen ënquimbi matses icsaido cuidsho isash Nuquin Papa nëish bëdanendac –quequin tantiaquin ispombi.

² Nuquin Papa yacnobidi chian dapa icposh. Actepenquio yec acte-actectsëcquio isadposh. –Nuquin Papa icsaquido cuidquidquio nec – camenuec tied nëdënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëducuësh choboedën chuiquid dapa icsamboshë icquidën: –Yuanu –cauidaido niosh.

Chuiquid dapa icsamboshë icquidbimboecnuc
 nacnenaid tantiatipimbo icquido aido niosh.
 Adecbidi icsamboshë icquidën ancabudacpaden
 nainquio yec aton yuabo ictiapimbo yec
 aid cuëmëdaidbimboecquid 666 dada uaqin
 siadmetiapimbo icquido niosh. Adec abi
 tantiaquido icsho Nuquin Papan meniaid ten-
 tencate cuëdëmec cuëdëncuededposh. ³ Nuquin
 Papan namiaid Moises: –Nuquin Papan nac ëbi
 chieshënquidon ëbi cuesun secainquio icposh
 –quec cuëdëmpampicpadec cuëdëncuededposh.
 Nuquin Papa bëdamboen ismenuec abided
 cuidadec unësaidquio Esus aton Papabëdta tantiec
 cuëdëncuededposh naden chiec.

–Nadatiambo icquin nabanquidquio mibi nec,
 Papa.

Abitedimbo uaquidquio yec abitedishun Icbombo
 mibi nec, Papa.

Matsesën naid abitedi tantiaquidquio abimbo
 chuiquidquio mibi nec, Papa.

Mimbi naid bëdambo icnuc dacuëdampambo mibi
 iquec, Papa.

Nidaid utsi-utsiec yacno tabadquidon Icbo icpam-
 pidi adecbidi matses abitedishun Icbombo
 mibi nec.

⁴ Matses abitedishun: “Nuquin Icbo
 dacuëdampambo icquid neque.

Ambi chiacpadomboen nanuna,” mibi capashun,
 Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido
 cuidquimbi bëdambo icquido mimbi
 bëdamboen isendac.

Adsho isun nidaid utsi-utsiec yacno tabadquidon
 matses abitedishun: “Mibi bēdambo iquec.
 Con Icbombo mibi nec,” caindac
 —quec cuēdēncuededposh Esus tantiaquido.

⁵ Adshun isquien isadaidbon: “Nuquin Papa
 tabadte nec,” quequin shubuampicpadquid
 shubu shēcniacchobi icposh. Nuquin Papa
 tabadacnombo tantiamenuen aden ismeposhi.

⁶ Auēshquio Nuquin Papan chiacpadec ėmbi
 isboedo mayan bēdabo 7tedi cho-choposh. Matses
 icsaquido cuidquido niosh aido. —Nuquin Papan
 yuabombo nec —camenuc dashcute nac-nacquio
 icquid dasiuidcuededash dashcute bēshpiu-
 bēshpiumbo icquid shictonquecuededposh.

⁷ Adsho isun Nuquin Papabēd icquid dadanobi
 ėshēcquid abentsēcshun maspanēmpi shocosh
 piu nacnenaid icbo-icboen menebamposh.
 Ünēstiapimbo icquidēn Nuquin Papan
 nēishēnquioshon cuidte cushtoaid maspanēmpi
 niosh. ⁸ Adnubien Nuquin Papa tabadaid
 nuntanuēsh pushud-pushudpambo icposh. Adec
 dacuēdampamboecsho isash Nuquin Papa chuinec
 puduedtiapimbo icposh. Ĕnquin cuidambi
 padpidec Nuquin Papa yacno puduednushi niosh.
 —Abitedishun Icbombo yec dacuēdampambo
 icquidēn ambi tantiacpadomboen icsaquido
 uesquin cuidendac utsibon: “Chēn,” cadtiapimbo
 icquin —camenuen aden ismeposhi.

16

Maspanēmpin cushtoaid

¹ Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

² Adoaquien abentsëcshun ambi bedboed maspanëmpin cushtoaid nidaidënshun chiuimposh. Adnubien ëmbi isboed acte uguëducuësh choaed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaidquio icsamboshë icquid tanti-aquin abibimboecnuc nacnenaaid tantiaquido yec aton icbo cuëmëdquid dada uaquin siadmiaido icsho aden cuidposh.

³ Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacipamboecnuc intacuac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aïdtsen intacposh. ⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

⁶ “Ëmbi chiaid chuibanquidobëdta ëbi tantiaquido nua intac icnuc chieshëmënquidon cuesun secabudnepondash,” qeshun cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa —queposh mayan bëda acte dayun uaquid.

⁷ Aden acte dayun uaquidën chuisho tantiash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

⁸ Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses baded-badedquiec ushën pichiebudneposh.

⁹ Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

¹⁰ Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiaidobëd tabadacno

chuiumbeneposh. Adoaquien inchëshposh inchëshquio yec. Badiadenquio icposh. Adsho isash matses abitedi natiambo dacuëdcuededposh. ¹¹ Adec dacuëdcuededec: —Ambi chiaid niacniacsho Nuquin Papan nuqui cuideque. Nuqui icsaid ënash ambi chiacpadec tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcablededposh.

¹² Adnubien utsintsen ambi bedboed maspanëmpin cushtoid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma poteneuquin aden acte uesadmeposh.

¹³ Adec aid matses cho-choabi icnuc ushë choacmishun cho-chometequidëmpi naden ismeposhi. Coqeshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidtedi chosho isombi. ¹⁴ Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuec niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa

chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuen mayan bédan aden ismeposhi.

¹⁵ Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yacbimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec —queposh Esus.

¹⁶ Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho is-poc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷ Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh. ¹⁸ Adnubien abu bedbedquetanepamboec abu tesquianenuc natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. ¹⁹ Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden

Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. ²⁰ Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. ²¹ Abucuëshquio ue dapa choacbimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushqin isacbimboecnuc aden ismeposhi.

17

Chido chishpidabimboecquid ismiaid

¹ Adshumbic maspanëmpin icquid chiuimboedën abentsëcshun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. ² Aido icsamboshë iquéc. Matses utsi-utsien abi chuiquid dapabobëdta

uisma uanten danoshcacbimboen Nuquin Papambo tantiamenquo icquin ambi chiaid niac-niacmequioposh. Aido cuidsho isec cho –queposh.

³ Adshumbic ushqin isacbimboecnuc ismeposhi. Nuquin Papan Mayanèn tantiamiac masiuidquo yacno shubu nibédacnombo chido aben icquid dapa catsadsho ispombi. Aben icquid piumboshë icposh. Aidèn dadan: –Nuquin Papa caid nibédquo iquec –quequin uesquin dada uapaidquo icposh. Aton mapi sietetedi icnuc aton pais 10tedi icposh. –Mimbi isboed acte uquèducuësh choboed chuiquid icsamboshë icquidquo nec –quequin aden aben icquid ismeposhi. ⁴ Aid catsadquid chido dashcute piumbo icquidbéd umumbo icquid dasiuidposh. Shocosh piu nacnenaid chedo cuënotempi nac-nacquo icquid chedo payuec aidbidi mësiuidposh. Dëshote bédambo icquid sanamposh. Aden sanansho dëshote anisquin isaquien icsambo icquiduidquo icposh. –Chido chishpidabimboec Babidonia caid yacnocquido icsamboshë iquec. Uisma uanten danoshcacbimboen: “Nuquin Papa caid nibédquiec,” quequin tantiamequin matses utsibo dadpenquo icsamequiendac –camenuen aden ismeposhi. ⁵ Adshun isquien aid chido abi tantiamete abi cuëmédquid bétanteteno bédada uadac. –Babidonia yacnocquido bédambo icquido damianquidi icsamboen tabadméquido nec –quequin dada uaid icposh. ⁶ Aid chido paëmbo icquid acacbimboec Esus tantiaquidon intac acash tantiaidenquo yamposh. –Babidonia caid yacnocquidon Esus tantiaquido dadpen cuesun secain-

dac –quequin tantiamenuen aden ismeposhi. Dacuëdampamboecsho isash: –¿Mitsipadquiopequini ique? –quebudquiobi.

⁷ Adbudquioshobini aid mayan bēdan: –“Tantiadenquio iquec,” ¿quecta ique? Tantia. Chido chishpidabēdta abi catsadaid aben icquid chuinu. ⁸ Mimbi isboed aben icquid icsamboshē icquid ictenedi nēbi nibēdec. Yuecshun Satanasēn abi tabadacnoshon padpiden chomendac. Adoacsho yuecshun Nuquin Papan chian anēdēnquiacno nēsecaindac. Aden cuidabi Satanasēn chomebocsho isun Nuquin Papa tantiesabon: “Comapenen tantiaquidien nechitec. Matses nibēdanēdai uincuenashien choachitosh. Aidi tantianu,” caindac. Matses uabi icquin Nuquin Papan: “Ēbi tantiaquido iquendac,” cacmaidonquio adoendac –queposh mayan bēda.

⁹ Adshumbic padpiden chuiposhi. –Tantia. Ēmbi chuiboed bēdamboen tantiamenuen chuinu. Naden tantiamenuen aben icquidēn mapi 7tedi icquid mibi ismiombi. “Babidonia caid yacno matses icsa uaquido tabadacno macuēsh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰ Aid chuiquid dapabo 5tedi nibēdnubi utsi abi iquec. Nēbi aidēn aton matses namec. Utsitsen choendac. Choshon aton matses nametantsequi badedquio nibēdanendac. ¹¹ Nibēdanēdai choashic ěmbi ismeboed acte uquēducuēsh choboed chuiquid dapa icsamboshē icquidquio iquendac. Aidēn ěmbi chuiboedo chuiquid dapabo 7tedishun namiacimboen aton

matses icsamboenshë namendac. Adoacsho isun Nuquin Papan icsaido cuidquiacno nësecaindac — queposh mayan bëda.

¹² Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac.

¹³ Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” queshun aden icsamboshë icquid abi chuiquid dapa icmendac. ¹⁴ Aden Esus chieshënquidon: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icho Esusën abided cuidadec unësaidën namiac chieshtoenquio iquendac. Aden abi tantiaquidobëdta chieshënquin cuesun secanuec cho-chosho isun Esusëmbi cuesun secaindac. “Èbien matsesën Icbombo nec,” quetanquin adoendac —queposh mayan bëda.

¹⁵ Adashic padpidec: —“Nidaid utsi-utsiec yacno tabadquido dadpenquio Babidonia caid yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi.

¹⁶ Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshënendac. Aden

chieshènquin cuesun secatanquin shububèdtabi nēdēncaindac nibēdquiecnuc. ¹⁷ “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquēducuēsh choboed chedo chuiquid dapabo icmendac. ¹⁸ “Matses utsi-utsien chuiquid dapabo aton matsesbēdtabi yuaquid abi iquec,” quequin mibi chido chishpidabimboecquid nēbi ismiombi —quequin mayan bēdan chuiposhi.

18

Nuquin Papan Babidonia caid yacnocquido cuidaid

¹ Aden Babidonia yacnocquido cuidte chuisho tantiaboshombic mayan bēda utsi Nuquin Papa yacnuēsh abucuēsh budsho ispombi. Nuquin Papan icmiacpadquid mayan bēdabo chuiquid dapa yec bēchamauanquiecposh. ² Choshombic nua cuēdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibēdquiecnuc abi tabadtenecnombo podobitsiuidpambo tabadendac. Ambobidi edesteuidquio tabadendac. ³ Babidonia caid yacnocquidon matses utsibo abitedimbo abi chuiquid dapabobēdta Nuquin Papa tantiamenquio icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquio icposh. Adsho Nuquin Papan cuidquiendac —quequin mayan bēdabon chuiposhi. ⁴ Adnubien Nuquin Papa abucuēsh onqueposh. —Tantia, Esus tantiaquido. Mibitsen chuinu. Babidonia caid

yacnocquidon nacpadomboen nainda. “Aidobèdi icsasho ëbitsen cuidquionoshe,” queshun aidon namiacpadomboen nainda. Auëshquio niqueta –quesho tantiombi. ⁵ Nuquin Papa yacnoshombidi utsin chuiposh. –Ënèdenquio yec icsauidequi icsho isun ambi tantiacpadomboen Nuquin Papan cuidquiendac. ⁶ Babidonia caid yacnocquidon matses utsibo dadpenquio icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun –queposh mayan bëda. ⁷ Adashic abi onquec: –Babidonia caid yacnocquido cuidtequido nec. Ambi naiduidi naquin aton na dadpenquio bedash: “Aidtedi dayun uaic bëdambo iquebi,” quepec Nuquin Papan cuidte tantienquio yequi. Adsho tantiashun: “Natiambo icnuc comapenen cuidquiopashun,” caimbi. Otacquoq tantiec: “Nuquin matses yuabo dadpen icnuc nuqui bëdamboec tabadec. Chido niante bënë unësaid mëyadac bimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. ⁸ Adsho ambi: “Nëbi ëbi cuidec,” cacmaidënquio cuidendac. Nuquin Papanquio abitedishun Icbombo icquin comapenen tantiaquin nacnenquidquio icquin badedquio cuidquiendac. Aden dadpenquio unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububèdi dadpenquio nëdënquendac –queposh mayan bëda.

⁹ Adashic abi onquec: –Adec Babidonia yacnuësh nëdënquec pushudtonesho isash:

“Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac. ¹⁰ “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unësquimboshë iquec. Badedquo uesquin cuidquiopac,” quec sedenquecuededendac Babidonia caid yacnocquido tantiec –queposh mayan bëda.

¹¹ Adashic abi onquec: –Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquiec. ¿Tsuntsimbini ëmbi meniaid cuidquin piucquid menepatsiashba?” quec sedenquecuededendac. ¹² Aidobidi: “Nadquid Babidonia caid yacnocquido menequin piucquid dadpen bedtenembi. Nëidic shocosh piu. Nëidic shocoshquo. Nëidic casëdubimboecquid cuënote bëdambo icquid. Nëidic dashcute bëdambo icquid. Nëidic dashcute piumbo icquid. Nëidic dashcute umumbo icquid. Nëidic sëntebimboecquid nacnenaid. Nëidic aben icquid edepanten shëta nacnenaid. Nëidic cuëte utsi bëdaidquo nacnenaid. Nëidic shocosh utsi nacnenaid. Nëidic cuënote nac-nacquio icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³ Utsitsen dadpen bedpadenec. Nëidic batambo icquid sabimboecquid.

Nëidic bédambo nuadte. Nëidic bédambo nuadec danoshquete. Nëidic acte paëmbo icquid. Nëidic bëchi. Nëidic pan nacnentequid. Nëidic nëish yua baca caid. Nëidic nëish yua utsi obeca caid. Nëidic nëish yua cabayo caid. Nëidic matses antsadsho cabayon nimbanquin buante. Nëidic ambi chonoa uatequido matses ambi ampequin bedaido dadpen. Babidonia caid yacnocquidon aitedi dadpenquio bedtenesho aton piucquid dadpen bedpadenembi,” quependac nidaid utsi-utsiec yacno tabadquido –queposh mayan bëda.

¹⁴ Adashic abi onquec: —Abi piucquid menedenedën dayun uaid nibëdanesho isash: “Aid matses bunaidquio ambi dayun uaid pete nibëdquiec. Ambi dayun uaid dashcute bédambo icquidbëd aton na utsi dadpen abitedi nibëdquiec,” ¹⁵ quiash natiambo dacuëdec uanoshon isec tabadec sedenquecuededendac abi piucquid menedenedo tantiec. ¹⁶ “Aid matses tantiac unësquimboshë iquec. Matses dadpen yuaquin matses dadpen namepadenec. Aton matses dashcute bédambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casëdubimboecquid shocosh piu nacnenaid payudenec. Utsibic casëdubimboecquid utsi payuec mësiuidtenec. Adec: ‘Con na dadpenquio icnuc bédamboec tabadebi,’ quepadenec Babidonia caid yacnocquido. ¹⁷ Adsho isun Nuquin Papan abi ushëmbi cuidquiac ambi dayun uaidbëd aid matses badedquio nibëdanac,” quec sedenquecuededendac abi piucquid

menedenedo tantiec. Adecbidi nidaid utsin icquidotsen sedenquecuededendac. Nèidic cano dapa dancha icbo. Nèidic dancha icbobèd nidquido aton yuabo. Nèidic icbo piucquid meniash dancha antabèdtoquido. Nèidic nuècquid bedshun piucquid bednuen menequido. Aidedi uanoshon isec sedenquecuededendac. ¹⁸ Nèdènquec pushudtonesho uanoshon isash: “Adquido utsi nibèdec,” ¹⁹ quiash natiaquiec sedenquecuededendac. Adec shubiec: “Èbipadquid dancha icbon bèaidtedi bedshun piucquid dadpen menedenedo tantiac unèsquimboshè iquec. Is. Cuidquiac badedquio nibèdanaque,” quec sedenquecuededendac — queposh mayan bèda.

²⁰ Adashic mayan bèdabidi: —Èbien cuishonquendac. “Nuquin Papa yacno tabadquidotsen èbèdi cuishonque,” quequin chiendambi. Esus tantiaquido chuiquinc Esusbèd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshènquin natiamiacpadomboen mibi chieshènquido Nuquin Papan uesquin cuidquioshe,” quequin chiendambi — queposh mayan bèda.

²¹ Adnubien mayan bèda utsin uidènquio icquidènquio nidaid moco nuacquid dapa yuèmboshè icquid cadotanquin acquimboen acte nènebidanquimbi chuiposh. —Èmbi acquimboen nènebocpadomboen Nuquin Papan Babidonia caid yacnocquido uesquin cuidquiendac nibèdquiecnu. ²² Adoac aido ictenecnombo

nadimbo iquendac. Ten-tencate ten-tencainquo iquendac. Utsibobic cuèdënenquo iquendac. Utsibobic shoncate shoncainquo iquendac. Cuète chëshun nacnenenquo iquendac. Piacbo macuesenquo iquendac. Nadimboshë iquendac. ²³ Tabote taboadaid nibëdendac. Dada aton chido ambi nëbi bedaidbëdi mamënenquo iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiamequin icsamepadenec,” quendac. ²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac –queposh mayan bëda.

19

Chieshënquido cuidacsho isash cuishonquiaid

¹ Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquo Esus tantiaquido dadpenquioshë comapenec cuèdëncuededposh.

–Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided ciudadec unësaid tantiasho matses bëdamboen isec.

2 Muesambo icquin ambi chiacpadomboen
naquidquio nec.

Abi tantiesabo ënëdenquio yec icsauidequi icsho
cuidquidquio nec.

Adquid icquin: “Icsamboshë iquec,” quequin mat-
ses utsibo icsamequido Babidonia caid yac-
nocquido cuidquioposh.

Nuquipadquid Esus tantiaquido cuesun secacsho
isun cuidquioposh

—quec cuëdëncuededposh.

3 Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncuquin
Babidonia caid yacnocquido uesquin
cuidquioshe

—quec cuëdëncuededposh Esus tantiaquido dad-
penquioshë.

4 Adsho tantiash Nuquin Papa chuiquid dapan
tsadten tsadnuc abi dacuenadec tabadquido:

—Nuquin Papa Nuquin Icho nec —quequin
ismenuc danëshën tinquebudcuededposh.

Adec tinquebudcuededequi: —Abimbo caic.
Nuquin Papa bëdambo iquec —quecuededposh
dadanobi ëshëcquido 4tedi icquido tsusiobo 24tedi
icquidobëdi. 5 Adashic auëshquiobidi abentsëc
cuëdposh.

—Nuquin Papa matses uaquidquio yec
bëdamboshë iquec, canuna.

Nuquibi abi tantiaquidtedishun: “Nuquin Papa
bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna —queposh.

Esusën abi tantiaquido beduante chiaid

⁶ Adsho tantiash abu tesquianiacbimboec actenua chododoquiacbimboec Nuquin Papa yacnoquido dadpenquo cuëdëncuededposh.

—Abi chieshëncuquidon Nuquin Papa dëniactiapimboiquendac.

Ambentsëqui abitedimbo namendac.

Nuquin Papa bëdamboshë iquec.

⁷ Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquo beduanacbimboen abided ciudadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacnemëdquiacbimboec:

“Nëbien con Icbo chochitec,”

quiash Esus tantiaquido bëdamboec tabadec.

⁸ Abi tantiasho Nuquin Papan bëdamboen isaidoyec abi icsaid ënash:

“Nëen con Icbo chochitec,” quiash bëdamboec tabadec.

Aden abi tantiasho Esusën dashcute chuca ushumbo icquid dasiuinacbimboen abitedi icsaisa icmendac

—quec comapenec cuëdëncuededposh.

⁹ Adnubi mayan bëdan chuioaposhi. —Ëmbi chuibocpadomboen dada uata. “Ësadaidbo aton chido bedquin aton matses cho-chomiash pemec

bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuis-honquequiec tabadendac,” quequin dada uata. Abimbo caimbi. Nuquin Papan chiaidquio chiec nebi –queposh mayan bëda.

¹⁰ Adsho tantiashini Nuquin Icbo danec ismenuec danëshën tinquebuduidpoc. Adshobini: –Ëbi aden ismenda. Nuquin Papauidtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda –queposh mayan bëda.

Cabayo ushu catsadquid bëdamboshë icquid

¹¹ Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: –Abi tantiaquidobëd cuëshëdtiapimbo icquid yec ambi chiacpadomboen naquidquio Esusquio nec –quequin tantiombi. Ambi chiacpadomboen icsaido cuidquidquio icquin icsaido cuesun secanuec niosh. ¹² –Matsesën ompodëmëdtiapimbo icquidquio nec –camenuc cuëte isquidquio icquidbimboec ëshë icposh. –Abitedimbo chuiquid dapambo nebi –quec mauete dadpen maueposh. Abi cuëmëdquid abi bëdada uadaid tantiadenquio icposh. Ütsibon tantiatiapimbo icnuc ambentsëqui tantiate niosh. –Nuquin Papabëdtan Esusën naidtedimbo matsesën tantiatiapimbo iquec –camenuc adec bëdada

uadaid ismeposhi. ¹³ Abi cuëmédquid utsiembi tantiatsëccoc. —Nuquin Papapadquidquio yec abi tantiamanquid nec —quequin cuënaid niosh. Aton dashcute bëntse icquid cuidaidën intaquën punacbimboec piumboshë isadposh. —Abi tantiesabo cuidquidquio nec —camenuen aden ismeposhi. ¹⁴ Esus bëyuc nidnuc abi tsibanec abi tantiaquidobëd mayan bëdabo cabayo ushucquiduidquio catsadcuededec cho-choposh. Icsaisa icmiaido yec dashcute ushumbo icquid bëchish nibëdquidquio dasiuidcuededposh. ¹⁵ Abi bëyucquid ana shëcuënuëshquio chështe cuënumbo icquid cueshqueposh. —Ambi chiacpadomboen matses icsaido abitedi cuidquidquio Esus nec —camenuen aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ënë icnuc tish-tishachimboen nua intac icnuc cuesun secaindac. ¹⁶ Aton dashcute bëntse icquidën abi cuëmédquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bëusudquid yacnombo adembidi dada uaccosh.

¹⁷ Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuëdquin chuiposh. —Nuquin Papan cuidquin cuesun secaidon nami chec cho-cho.

¹⁸ Ëmbi chiacpadec cho-choshon matsesën nami mimbi nua tëpuisquin chendac nëidtedi. Nëidic matses utsi-utsien chuiquid dapabo. Nëidic sondado chuiquid dapabo. Nëidic dada cuesabo.

Nëidic cabayo chedo abi catsadquidobëdtabi. Nëidic matses utsibo abitedimbo. Nëidic matses yuabo. Nëidic matses yuapenquoio. Nëidic bacuëbo. Nëidic caniaido abitedi. Adquidtedi uesquin chec cho –quequin edeste chedo chuiposh. – Ambi tantiacpadomboen Nuquin Papan matses uesquin cuidquiendac –quequin aden ismeposhi.

19 Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. –Cabayo ushumbo icquid catsadquid Esusquio abi tsibanquidobëdta cuesun secanu –caqui ²⁰ cuesun secadenquoio icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiacpadomboen matses namequidquoio niosh. Adec muaquin abi chuiquid dapabimboecnuc nacnemequidtsen niosh. Adecbidi: –Ëbi chuiquidën yuabo nec –quequin matses dadpen bësiadmequid niosh. Adec icsamianquidquoio icsho bedposh. Abi chuiquid dapabëdta bedshun unës uabi chian dapa ënëdenquoio yec anëdënquequid icsamboshë nuadquidquoio nësecaposh. ²¹ Adshumbic Esusën ana shëcuënuësh chështe cuënumbo icquid cueshquequidën: –Ëbi chieshënquidotedi

unësta –caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. –Aden Esusèn abi chieshënquido nibëdamendac –camenuen aden ismeposhi.

20

Satanas uidën uaid

¹ Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaid dapa sanamposh. ² Adshumbic Eba icsamenuec nisipampid Satanasquio bedposh. Bedtanquimbic shocosh bucubimboecnuc nacnenaidën ambi sanamboedën uidën uaposh. ³ Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh puđuentiapimbo icnuc. Seta dadpenquio 1000tedi matameshun bëtashte chicshun Satanas cuemenuen adoposh. – Aden seta 1000tedi matamiabi icquin abi uidën uactedembi matses muauaquin icsametiapimbo iquec –queshun chicten bidiacquin uidën uaquioposh. Aden ismeposhi.

⁴ Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta

1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uguëducuësh choboed chuiquid dapabêdta abibimboecnuc nacnenaïd tantiapimbo icquido neposh. Adecbidi: –Aidën yua nebi –quec aid chuiquid icsamboshë icquid cuëmëdquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiac tabadopsh. ⁵ Unësaidotedi uincuemiambo icposh. Nuquin Papan ambi tantiactedi tauaquin uincuemeposh. –Seta 1000tedi matameshun utsibo abitedi uincuemendambi –quequin adoposh. ⁶ Adnubien tauaquin uincuemiaido bëdambo yec cuishonqueposh: –Padpidec unëstiapimbo iquebi –quiash. –Adquid icquin Nuquin Papan yuabo yec: “‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac –quequin aden ismeposhi.

Satanasquio chian anëdënquequid nëniaid

⁷ Adshumbic aïdtedquio seta 1000tedi matameshun uidën uaid chicquin Satanas cuemendac. ⁸ Adoaquien matses icsamenuec muaquin chiec nidaïd utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëidic nidaïd Coc caïd yacnocquido. Nëidic nidaïd utsi Macoc caïd yacnocquido.

Nëidic matses utsibo abitedi cuëte podotedi dadpenquioshë.

⁹ Aidedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. ¹⁰ Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanastsen nënendac. Adoac aido ënëdenquio yec natiamboshë iquendac. Aden ismeposhi.

Icsambo icquido cuidte chiaid

¹¹ Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuec adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec. ¹² Nuquin Papa yacno unësaido uincuemiaido abitedimbo tabadposh. Adnubien bëshunenquio icquin dada uaten dada uabanacbimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh. ¹³ Unësaido abitedi icposh. Utsi-utsiec unësacsho

chian dapa mad caid nëniaido uincuemiaido niosh. Utsi-utsiec nidaidèn chococaid uincuemiaido niosh. Adsho aidon naidtedi Nuquin Papan chuibamposh. ¹⁴⁻¹⁵ Adshumbic Esus tantiesabo icsho documento nibèdquidbimboecsho abi yacno tabadmenquo icquin chian dapa anèdènquequid uesquin nësecabamposh. Aden Esus tantiesabo nësecan unèstequido utsibo nibèdposh. Esus tantiesabo aton dada unèsan abi tantiate tabadacno utsibo tabadenquo icposh. Adnubien Esus tantiaquido Nuquin Papa yacno tabadec unèstiapimbo icquidquidquo icposh. —Adquid iquendac —quequin aden ismeposhi.

21

Nuquin Papabèd tabadaidquo

¹ —Esus tantiesabo chian anèdènquequid nësecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubèdi nidaid shèni nibèdnuc utsi chucambo icquidquidquo icposh. Ènden iccondaidd chian dapa mad caidtsen nibèdposh. ² Adnubien Esusbèdi Nuquin Papa tabadaidquo abichobi Edusaden chuca caid abucuèsh budposh. Chido nèbi bedboedèn aton bènè cuishoncamiacbimboec cuishoncamianquid yec bèdamboshè icposh. ³ Adnubien Nuquin Papa tsadacnuèshquo comapenec cuèdposh naden chiec. —“Con matses nec,” quiash nèbi Nuquin Papa matsesbèdi tabadendac cuèshèdenquo yec. Adsho isun aton yuabo icquin matses abitedishun: “Nuquin Icbombo nuqui tantiaidquo nec,” caindac.

⁴ Ambo Nuquin Papan abitedi chuca uacnombo aidbèdi tabadec matses shubitiapimbo iquendac bèun ucachimboec. Nidaid shënin tabadec abitedi unëstequiduidquio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac –queposh Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. – Aden abitedimbo utsi uaquin chuca uaindambi bédamboshë icnuc –queposh Nuquin Papa Esusbèdi. Adshumbic ëbi chuiposh. –Ëmbi aden chuiboed dada uata. Ëmbi muesambo icquin abimbo chiaid nec –queposh Nuquin Papa Esusbèdi.

⁶ Adashic Nuquin Papa padpidec onquec: –Ëmbi chuiboctedimbo nainquin naindambi utsibon: “Padi,” catiapimbo icnuc. Èndenquimboshë nidaid uabi ictenedi nebi. Nèbi adquid yec nibédantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboec ëbèd tabadte bunquidon con Mado Esus tantiasho ëbèdi tabadmendambi. ⁷ Satanasèn: “Chieshtomenu,” cauidaido Esusbèdta ëbi chieshtoenquio icquin tantiaquido ëbèdi tabadmendambi bédamboshë yacnombo. Ëbi papa casho: “Ai, con mado mibi nec. Con champi mibi nec,” caindambi. ⁸ Adshumbic utsibo chian dapa anédënquequid icsamboshë nuadquid nësecaindambi. Nèidtedi icsamboshë icquido adoendambi. Nèidic ëbi bëdiactsëc

tantiauidtsëchoedobi chieshëmënquidon: “Cuesnu,” cac chieshtoash tantiesa yanoaido. Nëidic Esus tantiesabo abitedi. Nëidic icsamianquido. Nëidic chieshëmë nec cuesunianquido. Nëidic dada aton dada utsibëdi chichudnanquido. Nëidic aton chidopenquio chudquido. Nëidic aton bënëpenquio chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidtedi chian dapa anëdënquequid nësecaindambi —queposh Nuquin Papa.

Abi tantiaquido Esusbëd icte chiaid

⁹ Adnubien mayan bëdan Nuquin Papan matses cuidte cushtoaid chiuimboed abentsëc choshon chuoaposhi. —Isec cho. Chido nëbi bedboedën aton bënë cuishoncamiac bimboen abided ciudadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen. ¹⁰ Adshumbic Nuquin Papan Mayanën tantiamiac ushquin isac bimboen isombi. Mayan bëdan ëbi buanquin ispombi. Aden buanshun macuësh dapa mananënquio tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh. ¹¹ Aid tabadaidquido aid shubutedi Nuquin Papa tabadaid yec abi yacpadquio abichobi bëchamuanquiecposh. Casëdu bëdambo icquid bimboec isquid-isquidquido isadposh. ¹² Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi

icposh. Aid shëcuë icbo-icboen isquid yec mayan bédabo 12tedbidi icposh. Aid shëcuë bétashte 12tedbidi icposh. Aid bétashten Acobon mado cuëmédquid 12tedbidi dada uabampaccosh naden. Bétashten Acobon mado Ose cuëmédquid dada uatanquin bétashte utsin Acobon mado utsi Uda cuëmédquid dada uatanquimbic adenuidi bétashten bétashtenquien Acobon mado cuëmédquid cuëmédquidquien dada uabampaccosh. ¹³ Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidedtbidi shëcuë icoaposh. Ushë nibëdaucbidi sud yauc aidedtbidi shëcuë icposh. Ushë budauc aidedtbidi shëcuë icposh. ¹⁴ Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbéd icquido ëbitedi cuëmédquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmédquid Uan dada uatanquin cuënote utsin Petedo cuëmédquid dada uapaccosh. Adenuidi cuënoten cuënotenquien Esusbéd icquido cuëmédquid cuëmédquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaïd aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmédquidotedi dada uaidbëdta Esusbéd icquido cuëmédquid dada uaid aden ismeposhi.

¹⁵ Adshumbic ëbi chuiboedën mayan bédan shocosh bédaidquio nacnenaid tambante sanamposh. —Nuquin Papa tabadacno

tambanquin daquënë uaidbëdtabi puduedte shëcuëtedi tambanten tambanu —queposh. ¹⁶ Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquiobidi icposh. ¹⁷ Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaid tambanten tanac metedos 65ted cactiombi icposh nuamboshë bitsipambo.

¹⁸ Daquënë uaid abichobi isquid-isquidquo isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenaiduidquo yec nac-nacquo icposh. ¹⁹ Aid daquënë uaqin tauaqin sandoaid nidaid cuënote dapa casëdubimboecquid bëdambo icquid matses comapenec bunaidquo utsi-utsien dabitaccabanaid niosh. Abentsëc aspe caid umu-umumboctsëcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. ²⁰ Utsibic onise caid piumbo icquid. Utsibic conadina caid piu-piupactsëcquid. Utsibic quidisodito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo

icquidbidi. Aidedi dabitaccabanaccosh. — Nuquin Papa yacnombo bédamboshë iquendac —camenuen aden ismeposhi. ²¹ Daquënë uaid puduedte shëcuë 12tedi icposh. Aid bëtashtetedi acte chiumbimboecquidën casëdu ushu uaid nuacquid dapambo abichobi-abichobien nacnenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpuiuctsëcquid acte-actectsëcquio icnuc mabiunaid icposh. — Esusbéd Nuquin Papa tabadacnombo bédambo icquiduidquio iquendac —camenuen aden ismeposhi.

²² Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaidbéd Nuquin Papa icsho bëisquioquin tantiec anocquido tabadendac. ²³ Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunuec abided cuidadec unësaid Èsusbéd Nuquin Papa bëchamauanquieccquid icquin ambo ushëmbouidi icmendac. Inchëshaid tantiadenquio iquendac. — Nuquin Papa icsaisambo icnuc abi yacno icsaido nibëdqüo iquendac —camenuen aden ismeposhi. ²⁴ Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenec tabadcuenash: — Esusbéd Nuquin Papa abitedishun Icbombo nec. Abipadquid utsi nibëdec —quendac. ²⁵ Nuquin Papa matsesbëdi tabadacnombo inchëshenquio

icnuc: —Icsambo icquido puduednushe. Bētashnu —quetiapimbo icsho isun daquënë uaid shēcūē bētashenquio iquendac. Shēcniacchobi iquendac. ²⁶ Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daēdpactsēc tantiaquin matses daēdpactsēc namebampadenembi. Nuquin Papa aton Mado Esusbēdi comapenen tantiaquidquio yec abitedishun Icbombo nec. Abipadquid utsi nibēdec —quendac abitedi. ²⁷ Ambo icsambo icquid puduedtiapimbo iquendac. Adecbidi omposhon abi bunaiduidi naquidobēd muaquido puduedtiapimbo iquendac. Nuquin Papan bēshunenquio icquin dada uacbimboen: —Icsambo icboedi abided ciudadec unēsaid con Mado Esus tantiaquido aido nec. Con bacuēbo nec —capendac. Aden ambi con bacuēbo caido abi yacno puduedendac. —Nuquin Papa yacno adquio bēdambohēuidquio iquendac —quequin aden ismeposhi mayan bēdan.

22

Nuquin Papa yacno acte ismiaid

¹ Adshumbic aid mayan bēdan padpiden ismeoaposhi. Adoac Nuquin Papa abided ciudadec unēsaid aton Madobēdquio tsadte dapan tabadacnuēsh matses unēstiapimbo icmetequid acte bēdambo icquid nushan nibēdquidquio chēuēdsho ispombi. ² Nuquin Papa yacnuēshquio choec chēuēdec ambo tabadquido Esus tantiaquido tabadaid shubu nēnantanquio chēuēdposh. Aid cuēmambi matses unēstiapimbo

icmetequid cuëtetsen icposh. Baded-badedquieic bacuëquidquo niosh. Inchëshën ushë choanchoanquieic badedquio bacuëquid niosh. Aid cuëte podo nidaid utsi-utsiec yacno tabadquido bëdambo icmetequid niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi. ³ Aden abitedi bëdambo icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquieic Esus tantiaquido tabadendac. ⁴ Adec: —Con bacuëbo nec —quequin Nuquin Papan abi cuëmëdquid dada uaquin bësiaidon Nuquin Papambo bëisquieic tabadendac. —Nidaidën tabadec bëdamboec tabadquido Nuquin Papabëd tabadec abipadquio bëdamboshë yanendac —camenuen aden ismeposhi. ⁵ Ambo bëdambouidquio yec inchëshenquio iquendac. Nuquin Papa bëchamauanquieicquidëmbi ushëmbouidquio iquendac inchëshaid tantiadenquio yec. — Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶ Adshumbic mayan bëdan chuioaposhi. — Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin

dada uapampic. Adembidi aton Mayanën nami-aid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi –queposh Nuquin Papan abi yacnoshon uaid mayan bëda.

Esus chote chiaid

⁷ Adnubini Esusënquoio naden chuiposh. — Chieshtoenquoio icquin ëbi tantiata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

⁸ Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec. ⁹ Adshobini: —Padi. Aden ëbi ismenda. Mibipadquid Nuquin Papan yuabidi nebique. Ëndenquimboshë Nuquin Papan tantiamiac min tsusedpabo isadaidbon ambi chiaidquoio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsëqui tantiaquin aden ismeta —caposhi mayan bëdan.

¹⁰ Adashic padpidec: —Ëmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquoio icquin Esus tantiec ma tabadnu,” queshun dada uata. ¹¹ Nëbimbobi Esus chonoc Esus tantiesabo

badedquo bēdamboec tabadcuentiapimbo iquendac. Abi icsaid badedquo ėntiapimbo iquendac. Esus tantiaquido abi bēdamboec tabadacpadquiecbidi bēdamboec tabadpashun –queposh mayan bēda.

¹² Adnubini Esusën chuioposh. — Chieshtoenquo icquin ėbi tantiata. Nēbimbobini choendac. Choshon matsesën naidtedi tantiaquin icsaido cuidquimbi ėbi tantiaquido ėbēdi tabadmendambi. ¹³ Nuquin Papapadquidquo nebi. Ĕmbi tantiacmaid nibēdnuc abitedi comapenen tantiaquidquo nebi. Nidaid uabi yec ictenedi nēbi adquidquo yec nibēdantiapimbo icquid nebi. Adquid yec abitedishun Icbombo nebi.

¹⁴ Icsambo icboedon ėbi tantiasho icsaisabimboecnuc Nuquin Papan bēdamboen isendac. Adshun ėbi yacnombo puduedmequin unĕstiapimbo icquido icmendac unĕstiapimbo icmiantequid cuĕte bacuĕ chemiacbimboen. ¹⁵ Padnuen ėbi tantiesabo bēdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nēidic nēnēchoquidobēdi cuĕte podo chodcashun unĕs uante bunquido. Nēidic dada cuididimbo. Nēidic chido chishpida. Nēidic aton chidopenquo chudquido. Nēidic aton bēnĕpenquo chudmequido. Nēidic cuesanquido. Nēidic papa quequin ambi nacnenaidi tantiaquido. Nēidic abi bunaiduidquo naic muauanquido. Aidtedi Nuquin Papa yacno puduedtiapimbo iquendac.

¹⁶ Ĕmbi chiacpadomboen mayan bēdan mibi ismebamposh. “Ma ėbi tantiaquidon iste dada

uanu,” quequin ëmbi chiacpadomboen mibi ismebamposh. Nuquin Papan dada uamiac matesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquio nebi. Utsin: “Dëniacnu,” cadiapimbo icquid nebi. Adquid icquin matses abitedimbo namendambi –quequin chuiposhi Esusën.

¹⁷ Adsho tantiashun Nuquin Papan Mayanën tantiamiacpadomboen chuiquin: –Nëbimbobi Esus chonoshe. Aidquio tantiabenta –caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: –Nëbimbobi chonoshe. Aidquio tantianuna –cac bëdambo ictsiash. Adsho tantiash Esus tantiesabo acte bunacimboec Esus tantiate bunsho Nuquin Papan bëdamboen isendac. Nuquin Papa bëdamboen ismenuen menete nibëdnuc Esusuidi tantiasho Nuquin Papan bëdamboen isquin abëdi tabadmendac.

¹⁸ Tantia. Ëmbi chuiboed tantiaquido chuinu. Nuquin Papan: –Nadquid iquendac. Yuecash utsi iquendac –quequin ëbi ismeboedtedi dada uaombi. Ëmbi dada uaboed tsitënquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe. ¹⁹ Adembidi ëmbi dada uaboed utsi uainquio icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquio ictsiash. Adembidi bëdamboshë yacno abëdi mibi tabadmenquio ictsiash.

²⁰ –Ma aidtedi tantianu –quequin Esusën chiacpadomboen mayan bëdan aidtedi ismeposhi. Ëmbi

chuibocpadomboen Esusën: —Nëbimbobini choendac —caposhi. Adsho tantiashun: —Ai, nëbimbobi chota —capombi.

²¹ Mibitedi Esus tantiaquidotedi tantiaquin: —Ambi nabocpadomboen Nuquin Icbo Esusën bëdamboen isquin bëdambo icmepashun —caimbi. Padi. Aidedi chuiquin dada uaombi.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

446da786-5bd1-5ffa-85e2-9eff4052cf8b